



RESERVADO

311

B. N. L.


5/2





~~71-68~~

108



RES. 311

also 32

~~108~~

Historia
DE BELLO AFRICANO:
In quo

SEBASTIA-
NVS, SERENISSI-
MVS PORTVGALLIAE
Rex, periit ad diem 4. Aug.
Anno 1578;

Vnà cum
ORTV ET FAMI-
LIA REGVM, QVI NOSTRO
tempore in illis Africa regioni-
bus imperium tenuer-

unt.
Ex Lusitano sermone primò in
Gallicum: inde in Latinum
translata,

PER IOANNEM THOMAM
FREIGIVM D.

Noriberga.

CIO. IO XXCI.

mc 339046 - G





IOAN. THOMAS

FREIGIVS IOAN-

NI MARTINO OL-

TINGERO

S.



TSI HISTORIA
hac de regis Lusitani cade,
que in Africa ante bienni-
um contigit, perquam bre-
vis est: multa tamen con-
tinet & eventu inopinata & cognitione ju-
cunda. Ut. n. de moribus Maurorum, de ge-
nealogia regum Barbarorum, de Geogra-
phia hic nihil dicam, (nam de his inferius
peculiari loco necessaria quedam ad huius
historie intelligentiam subjiciemus) utq, in-
teritus exercituū, clades regum & ducum,
mutationem regnorum, πᾶσι δὲ θῆται multi-
tudinis, cupiditatem et cetera vitia princi-
pum omittam: primò Xarifus ille, qui proa-
vus horum Mahumetanorū regulorum fu-
it, exemplum est hominis obscuri, sed è tenui

fortuna ad excelsum regie dignitatis decus evecti. Nepotes verò ipsius inter se de regni possessione in mutuam perniciem concurrentes, docent quanta vis sit ambitionis & regnandi cupiditatis, quæ homines ita transversos agit, ut fraterni amoris obliti, non recusent immania quævis perpetrare, modo aliqua dominandi spes affulgeat. Hac Abdallam quoq; cò insania adegit, ut fratrum sanguine se respergere & parricidio manus inquinare non veritus sit, ea tantum de causa, ut fratribus è medio sublatis, tutam sibi ad regnum viam muniret. In hac igitur historia etiam illud, quod vulgari proverbio jaëtatur, verissimum esse deprehenditur, nimirum fratrum iras esse acerbissimas: & ut Plutarchus ait, δεινὰ εἶναι τὰ τῶν τυράννων λήμματα: quale illud etiam est, quod Casarem ex Euripidis Phænis- sis usurpassè Cicero refert:

Εἰπερ ὃ ἀδικεῖν ἤν, τυραννίδος περὶ
Κάλλιστον ἀδικεῖν: πᾶλλα δ' εὐσεβεῖν χρεών.

Nam si violandum est jus, regnandi gratia
Violandum est: aliis rebus pietatem colas.

Accedit in rege Lusitano πολυπραγμο-
σύνη, qui non necessario bello se implicans,
decus regium unà cum vita miserè amisit,
tristemq;

tristemq; & luctuosam sui memoriam sub-
ditis reliquit. Nec verò illud de casibus &
erratis bellorum negligendum est, in qui-
bus bis peccare non licet: deq; incondita
turba & magnis impedimentis lixarum,
calonum, muliercularum in castra non e-
ducendis. Jam verò de causis cladis, quam
Lusitanus perpeffus est, locus hic quoq; dis-
serendi esset, nisi vereri cogeremur ne,
quod ab Hannibale Phormioni objectum
est, idem nobis qui nunquam castra, nun-
quam aciem aspeximus, objiceretur. Nam
(ut est apud Ciceronem lib. 2. de Oratore)
cum Hannibal Carthagine expulsus Ephe-
sum ad Antiochum venisset exul, proq; eo,
quòd eius nomen erat magna apud omnes
gloria, invitatus esset ab hospitibus suis, ut
Peripateticum Phormionem, si vellet audi-
rèt: cumq; is se non nolle dixisset, locutus es-
se dicitur homo copiosus aliquot horas de
Imperatoris officio, & de omni re militari.
Tum cum ceteri, qui illum audierant, ve-
hementer essent delectati: quarebant ab
Hannibale, quidnam ille ipse de illo philoso-
pho judicaret. Hic Pænus, non optime Græcè,
sed tamen liberè respondisse fertur, Multos
se deliros senes sæpè vidisse, sed qui magis
A 3 quam

quàm Phormio deliraret, vidisse neminem.
Neque me herculè injuria. Quid enim aut
arrogantius aut loquacius fieri potuit,
quàm Hannibali, qui tot annos de imperio
cum populo Rom. omnium gentium victore
certasset, Græcum hominem, qui nunquam
hostem, nunquam castra vidisset, nun-
quam deniq; minimam partem ullius pu-
blici muneris attigisset, præcepta de re mi-
litari dare? Quæ quanguam ita se habent:
quid tamen prohibet hominem in umbra
educatum, & militaris sudoris ac pulveris
expertem, de præceptis rei militaris inge-
nii exercendi causa, ex eruditorum homi-
nū monumentis differere? Præcipiunt igitur
Tactici, ut ante congressum pralii sin-
gularis cura delectus & comæatus: in ipso
verò prelio virium, loci, ordinis & cohorta-
tionis ratio in primis habeatur. Et si autem
ex hac historia apparet, Regi Lusitano co-
tem illam militaris fortitudinis, quæ in co-
hortatione consistit, minimè defuisse: cate-
ra tamen omnia Abdelmeleco, illius ad-
versario, prolixiora & abundantiora affu-
erunt. Nam in delectu militum veterano-
rum & quidem sclopetariorum, quos Mau-
ris opponere debuerat, planè improvidus:

& à commentu adeò imparatus fuit, ut
multifame in ipsius exercitu extincti sint.
Tam malignè autem stipendium militibus
solvit, ut mirum sit tam paratis eos ad præ-
liandum animis fuisse. Deinde quod ad
ipsum congressum attinet, viribus Maurus
Lusitano longè superior fuit; & locus ipse
(utpote excelsus) vice multorum militum
pro Abdelmeleco pugnare visus est, præser-
tim cum ventus quoq; & Solis splendor Lusi-
tanis copiis adversi essent. Quin & lunata
illa Geometrica figura acies, qua quadra-
ta Lusitani acies circumventa est, ordinis
indiligentiam exprobrare regi videtur. Ut
omittam omnia, è colloquio regis Hispani, &
principum suorum cum debortantium vo-
cibus captata, quæ non obscuram significa-
tionem adversi eventus præbuerunt. Sed
animo cupienti & suis consiliis innixo, ist
nihil satis festinatur, ita etiam frustra ceu
surdo fabula canitur. Jam verò tria exem-
pla trium Regum, eadem propè hora, vario
mortis genere defunctorum, præcipuè in
hoc misero theatro aspectabilia sunt. Mu-
leius Mahametius, autor tot tantorumq;
malorum, prostratis undiq; copiis fugæ sese
mandans, dum fluvium Mazagam traji-

cere conatur, ab equo ex cæno eluctante excussus, in lutulento aque gurgite submersus periit. Rex Sebastianus pugnans crebris ictibus contusus occubuit. Abdelmelecus debilitato per lactis coagulati esum stomacho, in castris obiit, non absimili morte Antonini Pii, qui (ut refert Capitolinus) cum Alpinum caseum in cana edisset avidius, nocte eum rejecit: & sequente die febre commotus, tertia die quasi dormiret, spiritum reddidit. Jam exemplum implacabilis in Mahametum mortuum & exenteratum odii, morem illius populi, antiquū quidem illum, sed adhuc hodie usitatum indicat, quo solebant mortuorum cadavera sale condire, ut ea à putredine conservarent: quæ ideo veteres Græci *ταξιευμένα* vocant, & eo verbo Herodotus sæpe utitur; sicut & Diodorus Siculus lib. 2.

Sed de proæmio satis. Hunc autem novum partum ut tibi, mi Oltingere, inscriberem, fecit nostra amicitia, purè sincereq; & sine omni fuco multis annis per nos summa constantia conservata: & eiusdem lingue Gallicæ studium, quod à me per viginti propemodum annos intermissum, tu perpetuis exercitiis tueris. Vides igitur quibus studiis

studiis me oblectem, quibus rebus otium (cuius Cato quoq; rationem reddendam dicebat) cum à publicis privatisq; negotiis respirandi occasio datur, fallam. Ad hoc autem transferendi munus, tres viri praestanti & singulari virtute & doctrina me adhortati sunt: Hieronymus Paumgartnerus septemvir & scholarcha: Joachimus Joachimi F. Camerarius Medicus, & Christophorus Scheurelius prator. Tu his mecum bene fruiere: & mei memoriam sartam teetam conserva. Vale. Dat. Altorfii, Calen. Maii, anno c13 13 xxc.

T*V* qua, Solis equos sinuoso tramite fessos
Tellus, Oceani salis procul excipis undis,
Et rediturũ iterum mergis sub gurgite Phæbum,
Hesperiiis habitata viris: qua queris ab armis
Insanam laudem, spoliis, auroq; superbam:
Aspice nigranti rorantes sanguine vepres
Atlantis quæ celsa jacent iuga, quaq; patescunt
Larissa campi, quos undis MaZaga largis
Præterit, & ripas undanti sanguine pulsat.
Cernis enim auspiciis minimè felicibus illic
Bellantum nuper tria cassa cadavera Regum,
Magnanimũmq; ducum, quos & Mavortia facta
Et genus ex alto deductum sanguine regum
Nobilitat: turbam obscuram quoq; conspicias illis
Dispersam campis, animam miserè exhalantem.

Quid non designat demens discordia, fratres
Immergens diris odiis, animoq, venena
Subjiciens? stultusne homines sic incitat error,
Ut cupiant aliena sequi, propriisq, relictis
Appetere infidis obnoxia sceptrata tyrannis?
Magna exempla vides, venturi nuncia casus,
Nec sapis, atq, intra pellem te contrahis arctam,
Desinis & sava glutire cupidine regna.
Hic fluvii rapidis Mahometus mersus in undis,
Et frusto lactis patrum sua fata coacti
Accelerans, stomachi fractusq, exinde dolore:
Rexq, tuus moriens alienis advena terris,
Languida dum firmis Mauris interseri arma:
Te docuisse queunt, nimium ne magna sequaris,
Sed medium tuearis iter: tutissima vires,
Sic nulla via deduxerit orbita recta.
Ille caput miserum, ceu flos succisus aratro,
Demittens: ille in proprio se sanguine turpans,
Ah miser, ah Mauros fecit clarescere campos
Herois letho, dextraq, opibusq, potentis!
Heu quantum cladis regnandi dira cupido
Affers, sollicitans dira irrequietaq, corda!
Hic triplices acies de magno culmine rerum
Congressu, & creperum meditata jure duellum
Ambiguo, evertunt natura dulcia acerbum
Nomina per Martem: nam dira mente nepotem
Invasit patrum: cum nigris insuper albi
Conseruere manus. Nequicquam scilicet illis
Opposuit natura maris tot provida fluctus.
Ergo fragor sequitur, plumbiq, e grandine nimbi,
Quos onerata levi cum pulvere machina rimis
Expuit,

Expuit, & glandes vacuas jaculatur in auras.
Ictibus interea responsat Mazaga crebris,
Et tumidas undas (res dira atq; horrida visu)
Insiciunt rubro longè lateq; colore. (hauris
Hinc clamorem hominū, fremitum istinc auribus
Campo insultantiū atq; jubas jaētantium equorum.
Cernis & hic acies, illic etiam, ordine rupto
Perfractas, totis castris pecudesq; virosq;
Palantes, alios tremulis in sanguine plantis
Lapsantes proprio, vel viscera rupta trahentes:
Lapsa trium quoq; cernis humi diademata Regū.
Quisnam magnanimo regi persuasit, ut ipse
Insidos Mauros ferro tentaret inertī? (dem
Quā pia cura Deūm? non hanc praeſentia cla-
Signa ē sublimi (si mens non leua fuisset)
Dixerunt specula? an cauda candente Comētes
Falsus erat vates splendenti extensus in aula
Caelestis regni? an cassus fide, deniq; mendax?
Quo vix quisquā alius per secula multa tremendo
Sydere maior erat: nullus qui crine refulsit
Longior, aut cauda luxit mage deniq; densa.
Sed quā fata vocant, Divūmq; aeterna voluntas,
Illac pergendum est miseris mortalibus usq;
Vnde etiam varii cæca deliria mentis
Casus, & duri comitantur fulmina lethi.
Heu quos tunc patria gemitus, quos undiq; luctus
Conjugibus pariet Mauris rex cæsus in arvis?
Ille patrem, illa suum lugebit nocte profunda
Sola thoro gelido conjunx viduata, maritum:
Ante suum tempus tristes quoq; fata parentes
Urgebunt, charis orbatī hoc turbine natis.


Vndiq;

Undiqꝫ, fœdato vultu, scissisqꝫ, capillis
Luctus erit, plangens immitibus ubera palmis.
Felix qui proprii contentus limite regni,
Tranquilla populos, placidaqꝫ, in pace gubernat:
Et pietate suos cives & legibus ornat.
Hunc non discordes vexans contentio fratres
Elicit è patriis laribus, sed tutus in aula
Pacata multos, nulli gravis, exigit annos.
Cumqꝫ, his terrenis anima hac ingloria vinculis
In superas rursus dimissa emerferit oras,
Æterna assequitur cœlestia pramia vite,
Inceditqꝫ, inter cives, animasqꝫ, beatas
Elysii campi, longa comitante caterva
Felix, ambrosia satura & de nectare vivit.

GENEALOGIA REGVM **MAROCENSIVM ET FES-** **SANORVM.**

Muleius Xarifius.

Muleius Mahametus Xequus.



HISTORIÆ
DE CÆDE SE-
BASTIANI, RE-
GIS LVSITA-
NIÆ,

CAPVT I.

DE ORTV ET FAMILIA RE-
GVM MAVRITANIÆ, QVAM HODIE
Barbariam vocant : & de causis bel-
li per Sebastianum Re-
gem suscepti.



*IVS familia & prosapia, qua inter
Barbaros hodie regium decus tue-
tur, autor & primus in eadem Rex,
fuit Maurus quidam Mahometana
religionis, nomine Muleius Maha-
metus Xequus. Huius pater Muleius Xarifius,
cum in patria Mecha, Maurorum princeps (ut-
pote ex damnati & execrandi pseudopropheta
Mahometi sanguine & stirpe ortum ducens) ha-
beretur, immensam vim pecunie & thesauros in-
gentes accumulauit. Is somnio nescio quo motus,
occasionem e sua patria & familia demigrandi,
& se una cum suis rebus in Africam conferendi
arripuit. Itaq; ut, quod secum constituerat, in ef-
fectum deduceret: Mecha cum unico, quem mo-
do diximus, filio egressus: & tota Egypto, Afri-
caq;*

caq₃, aliisq₃ regionibus Turcico imperio subiectis,
peragratiss: venit in eam Mauritania regionem,
quam hodie regnū Susorum appellant. Hic igitur
Muleius Xarifius, cum inter Barbaros Mauros
magnam (quod ad sectam & religionem ipsorum
attinet) sapientie opinionem consecutus, et per pro-
vincias Mahometico dogmate pollutas, insignem
famam adeptus esset: gratiam quoq₃ & favorem
Alarbi (qui in Barbaria ista degunt) nactus est:
in primis verò eorum qui regnum Susorum inco-
lunt. Hinc accidit, ut brevi temporis spacio mille
circiter clientes equites consecutus sit: ut taceam
magnum numerum ambactorum & servorū, qui
eum sequebantur, & equis armisq₃ juvabant. Ho-
rum et aliorum plerumq₃, qui postea se illi adjunxe-
runt, auxilio, aliquot urbes eius regni occupavit &
suo imperio subiecit. In omnibus verò expeditioni-
bus filium suum Muleium Mahametum Xequum
circumduxit, ut populi bello superati in verba eius
jurarent, & se, quæ fideles subditi dominis suis præ-
stare consueverant, facturos promitterent. Et quidem
interq₃, pater & filius, rerum suarum ita satagere
soliti sunt, ut brevi temporis spacio eas opes & vires
acquisiverint, ut Tirodantum regni Susiani caput
vi ceperint, ibiq₃ filius Xequus provincie illius Rex
constitutus sit. Hæc victoria novi regis potentiam
& animum maximopere auxit. Itaq₃ ordinari-
am validamq₃ legionem octo millium hastatorum
instituit, ea mente ut civitatē Marocum, cui tum
Marini imperitabant, tentaret. Quamobrem re-
lictō Susi patre, qui jam senectū fractus rebus ge-
rendis

rendis inutilis evaserat, Marocum obsidione cinxit, quingentis sclopetariis & hastatorum septem millibus secum adductis. Duodecimo die urbem deditione cepit: occupatisq; aliis urbibus & castellis Maroco vicinis, nomen et titulum Regis Sussorum & Maroci sibi desumpsit. Paucis diebus post, ingenti exercitu coacto, obsedit urbem Fessanam, quam nemine resistente, solo ingentis exercitus terrore cepit: rege ejus (qui Clandi nomen habebat,) fuga sibi consulente, & in urbem Tremissanam (qua eius imperio tum parebat, Turcicis armis adhuc intacta) se recipiente: in qua etiam breve tempus vixit, quod illi superfuit, consumpsit. Xequus autem quam primum Fessanus Rex est designatus, omnes eius regni urbes & pagi in verba eius jurarunt, & fidei ejus se commiserunt: idemq; aliae vicine gentes fecerunt, ultro se illi subjicientes, & victoriam sine sudore & sanguine tradentes. Limites autem & termini regni illius sunt, ab Oriente Tremissa (qua hodie Turcis paret) & ultra montis Atlantis (qui hodie Clarus dicitur) juga, versus meridiem linea, qua per provinciam Figigam oblique usque ad Zaharam (urbem a rege Lusitaniae captam) & hinc versus occidentem, quadraginta leucarum spacio à litoribus maris Atlantici seu Oceani, respiciens insulas Fortunatas (quas hodie Canarias vocant) tendit. Ab occidente litora & promontoria Aguessi, Casi, Azamora, Sala, Larissa, Letuanis, omnes urbes regni illius limitaneae, usque ad fretum Herculeum, versus Censam, Penonem & Melil-

Melillam (quas hodie Catholicus Hispania Rex possidet) & hinc Tremissam usq;. Toti huic regioni longè lateq;, Muleius Mahametius Xequus imperitabat, & patre paulò post mortuo solus imperium tenuit, fuitq; primus ex illa familia Mauritanorum Rex.

C A P. II.

DE LEGE, QVAM IN PROCE-
RVN CONCILIO MVLEIVS MAHAME-
tus de successione suorum filiorum &
regni inter eos post mortem su-
am divisione sanxit.

MVleius Mahametius cum postea summo in
Motu & tranquillitate multos annos re-
gnasset, cuperetq; ut regnis à se partis filii pacificè
uti frui possent: provecta jam aetate & annis gra-
vis, constituit principes ac satrapas provinciarum
sibi subiectarum convocare, ut ipsorum potissi-
mum consilio de successione liberorum suorum
maturius & prudentius statueret. Etsi autem
magnum eorum numerum habuit tam legitimo-
rum quàm naturalium: de illis tamen duntaxat
hic sermo à nobis instituetur, qui eius regni tur-
barum & tumultuum causa extiterunt: qui qui-
dem numero quatuor fuerunt. Ex quibus maximus
natus, legitimo conjugio ortus, dictus fuit Mu-
leius Abdallas: secundus & ultimus è legitimis
appellati fuerunt Muleius Abdelmunen & Mu-
leius Abdelmelecus: ultimus & minimus natus o-
mnium.

minium, nothus erat, nomine Muleius Hametus, qui hodieq³, regnum obtinet. Cum itaq³, ad concili-um regni procures in civitate Marocense (qua re-gis sedes erat) convenissent: & rex negotium in conventu principum proposuisset: consentientibus suffragiis decretum factum est, ut filii regis sibi invicem secundum aetatis gradus succederent, ut ita ad omnes jus regni perveniret, & dissidiorum contentionemq³, occasio omnis tolleretur. Hoc de-cretum, per principes factum, Rex amplexus est, & sua auctoritate confirmatum, jussit inviolabile ad posteros servari: tantumq³, perfecit, ut princi-pes & primores regni jurarent se operam daturos, ut id ratum in perpetuum permaneret. Nec verò principes tantum, sed & regii liberi idem jura-runt: nemo enim erat qui huic legi refragaretur, aut in contrariam sententiam iret. Quamobrem factum est, ut Muleius Abdallas (quod maxi-mus natu è filiis regis esset) statim in castris prin-ceps & haeres omnium paternorum regnorum no-minatus fuerit, omnesq³, in eius verba & obsequi-um jurarint. His rebus sic constitutis, cum Rex vetulus pro sua consuetudine in Marocense urbe se teneret, novum principem ad Fessani regni ad-ministrationem, petentibus id alioqui provinciae illius hominibus, dimisit. Hic cum Fessam perve-nisset, & à civibus comiter exceptus esset: provin-ciae illius administrationem leniter & humaniter auspicatus est, blandum & comem provinciae eius incolis se praebens, & multò leniora humanioraq³, in posterum promittens. Diebus aliquot post rege

Muleio Mahameto Xequo in summa pace flo-
rente, contigit in eius provincia tumultus, qui e-
um coëgit exercitum colligere & insolescentes re-
primere. Omnibus ad eam rem necessariis compa-
ratis, egressus Maroco cum multis equitibus et pe-
ditibus sclopetariis, Susa versus perrexerit. Cate-
rùm paucis diebus antiè, quingenti Turca Tre-
missa advennerant cum duce suo (quem lingua
sua vocant Alcaidam) qui se è presidio Tremissi-
no fugisse simulabant: sed re vera id agebant, ut
Regem Marocensem (id quod accidit) è medio
tollerent. Nam cum Marocum venissent, Rex, qui
eos ad suppetias sibi ferendas adesse putaret, ius-
sit ut statim stipendium illis numeraretur, seq, ad
bellum Susianum sequerentur. Illic cum rege e-
gressi, magnòq, itinere eum Susa versus comitati:
in limitibus duorum illorum regnorum, consilia
interficiendi ipsius accelerarunt. Itaq, cum se ne-
scio quid ad regem referre velle simularent, ex
promissimis audacissimisq, quibusq, circiter quin-
decim aut viginti pratorium ingressi, regem (quē
insidiis opportunū nacti erant) occiderunt, mor-
tuòq, caput præciderunt. Res tam repentina, ino-
pinatq, inter Turcos & Mauros (quorum illi
Turcici Imperatoris, hi Muleii Abdalla rebus
studebant) ingentem tumultum in castris exci-
tauit: devenitq, res tandem eò, ut intra hora spa-
ciū plus quàm mille Mauris occisis, non plus quàm
quingenta è Turcis occubuerint. Qui cum se
summa vi urgeri à Mauris cernerent, propu-
gnando & se defendendo in sylvas densissimas &

cautes montium asperrimas se receperunt. Sed cum & illic à Mauris oppugnarentur, frustra^q se niti & defensionem parare animadverterent: & ipsos commeatus etiam deficere jam inciperet: septem cados tormentarii pulveris sibi circumpositos incenderunt, miserabili incendio se potius perdere, quàm in manus hostium Maurorum venire volentes.

Caterum & regius exercitus Marocum reverti coactus est, ubi princeps Mulcius Abdallas (etsi is tum in urbe Fessana erat) denuò rex renunciatus est. Sed is quàm primùm de morte patris rescivit, Fessa egressus est: cumq^q se regem ferret, nulla provincia fuit, quæ cum libenti animo non exciperet. Itaq^q hac de causa paucis diebus post ingentem exercitum plurimarum nationum (quæ suam operam illi deferebant) contraxit: cum quo Marocum progressus, à civibus summa cum letitia, honore & gratulatione est exceptus. Nam & vivente adhuc patre subditorum suorum amorem ac benevolentiam singularem senserat, & eandem postea quoque eo mortuo sensit: quòd quamdiu vixit, nihil aliud nisi auream pacem ac suorum populorum tranquillitatem spectare, eosq^q sine omni maleficio felices & beatos conservare satageret. Qua de causa tantum opus ac divitiarum, quantum eorum regum, qui ante ipsum vixerunt, vix alius quisquam collegit. Ita Abdallas solus regnavit annos aliquot, sedemq^q regiam habuit alternis, uno anno in Fessana urbe, duobus in Marocense, donec eum sibi successorem

& heredem designavit, de quo mox plura dicemus.

C A P. III.

DE MVLEIO ABDALLA, QVI
CONATVS EST SVOS FRATRES IN-
terficere, ut sibi in regno succederet filius
Mahametus: ideoq; tribus fratribus oc-
cisis, cæterisq; fuga elapsis, filium
suum regni successorem
nominavit.

HISTORIA BELLI.

CVM Abdallas longo tempore in summa
tranquillitate regnum administrasset, so-
lusq;, nemine impediante, imperio & summa pote-
state usus esset: legem, quam pater cum regni pro-
ceribus promulgarat, qua filii per ætatis ordinem
deinceps à maximo natu usque ad minimum ad
regni successionem vocabantur, tollere & anti-
quare secum constituit. Et quanquam Abdallas
hæc consilia cum familiaribus, quibus plurimum
fidei habebat, clam & secretò coquebat: nihilomi-
nus tamen res tandem fratribus innotuit: quo-
rum aliqui de vita sua solliciti, & ne insidia sibi
struerentur timentes, regno excesserunt, ut Ab-
delmunen & Abdelmelecus, qui non sine ingenti
periculo, quod illis à fratris Abdalla servis insidi-
antibus in itinere imminebat, Tremissam perfige-
runt. Illic appulsi, comiter à Turcis, ut regii san-
guinis adolescentes, excepti sunt: pauloq; post Ar-
gelsam,

geliam, ut ibi sub Imperatoris Turcici tutela tutius degere possent, se receperunt. Mulcius Abdallas, cum (ut diximus) secreto eadem fratrum suorum agigaret, ut suis liberis regnum tuum tradere posset, audiretq; illos fuga sibi salutem quasivisse: dissimulato suo stomacho (magnam enim ex ipsorum fuga molestiam capiebat) ne reliqui fratres eodem metu percellerentur, sine mora omnes suas copias coëgit, eo prætexitu, quasi ad urbem Fessanam ire cogitaret. Itaque positis primò ante urbem Marocum castris, & his paulò post motis, quasi Fessam iturus, cum audisset suos fratres ad se visendum venire: relicto minimo fratre (cuius puerilem aetatem contemnebat) expectavit eos itinere quatuor ab urbe Fessana dierum. Cum itaq; convenissent, interq; se consalutassent: accidit ut paulò post nihil mali suspicantes, nihilq; insidiarum metuentes, immani crudelitate omnes tres in tentoriis suis decollati sint. Quae res animos Abdallae subditorum non leviter pupugit, sed summo dolore affecit, quem tamen dissimulare coacti sunt. Hoc tam tragico facinore patrato, Fessanum iter confecit, eo animo ut Mulcium Mahametum filium suum principem & unicum regnorum suorum heredem Fessanis obtruderet, illosq; in ipsius verba jurare cogeret. Nam etsi alios quoq; liberos, & quidem imperio digniores, haberet: tamen & quia hic natu maximus esset, & eius rei alias quoq; causas haberet, cum sibi potissimum successorem optabat. Itaq; quàm primùm Fessam venit, principum regni concilio coactò, rem eò deduxit,

ut filio fidem dederint, & in eius verba iurarent: magis metu coacti, quàm amore aut benevolentia erga principē, aut jure eius, quod in regno prætendere posset, adducti. His confectis, cum rem pro suo voto sibi successisse videret: ut deinceps in tranquillo otio, prope jam etate fractus, degere posset, Marocum cum exercitu rediit, relicto in urbe Fessana filio, ut eam provinciam suis auspiciis gubernaret.

C A P. IV.

DE MAXIMO NATV EX FILIIS XEQUI FVGITIVIS PER INSI-
dias trucidato, deq; gratia qua alter in Im-
peratoris Turcici aula floruit: deniq;
de morte Muleii Abdallæ & filii
cuius Mahameti succes-
sione.

Hoc rerum statu in Barbaria existente, cum
duo fratres, ad evitandum fratris Muleii
Abdalla furorem, se Argeliam contulissent: acci-
dit ut minimus ex illis natus Muleius Abdelmele-
cus Constantinopolim iret. Is in ea urbe, tali dex-
teritate arma tam mari quàm terra tractavit, ut
cum magnanimus, fortisq; & corporis viribus præ-
stans esset, in sui amorem plerosq; pelliceret: per res
strenuè gestas, victoriasq; de hoste partas, magni
nominis famam non solum apud populum, sed &
apud ipsum Turcarum principem consequeretur.
Quæ res et summam illi gratiam, honoremq; bene-
volentia plenum, conciliavit: & opes immensas pe-
perit.

perit. Ut taceam quibus quantisq, promissis eum
Turcicus Imperator oneraverit, quantamq, spem
illi fecerit de reducendo ipso in paternum regnum,
è quo fratris injuria depulsus fuerat. Caterù Mu-
lecius Abdelmunen, qui se Argelia tenebat, adeò
simplici ingenio fuit, ut fratris Abdalla persuasù
Tremissam redierit: quò Mulecius Mahametius tres
sicarios submiserat, qui eum de medio tollerent.
Qua res sane ex voto illi successit. Nam cum illi si-
carii Tremissam venissent, ita Abdelmuni oculos
adjecerunt, ut eum die quodam Veneris in templo
precantem, sagitta sanciarint: quo vulnere biduo
post, nullo insidiarù scelerisq, autore cognito, mor-
uus est. Abdelmelecus postquam Constantinopoli
de fratris morte cognovit, summo dolore affectus
fuit. Qua causa fuit, ut Solymannus, Turcicus Im-
perator, ad regnum suum recuperandum suppeti-
as ipsi promitteret. Sed quò minus id promissum
conficeretur, obstitit mors Sultani Solymanni, qua
paulò post secuta est. Caterum cum ad imperium
pervenisset Sultanus Amurathes (qui hodie Tur-
cis imperat) Abdelmelecus plus gratiae & fidei,
quam unquam antea, obtinuit. Circa idem tempus
Muleius Abdallas morbo correptus, cum eius vim
ferre nò posset, triduo post in urbe Marocense mor-
uus est. Decessus eius per triduum occultatus fu-
it, ut interea Mulcius Mahametius (qui tum in
urbe Fessana erat) certior fieret de patris morte:
neve patrui eius, si prius de morte fratris Abdalla
cognovissent, Marocensis urbis (in cuius possessio-
ne regni summa consistebat) principes se ferrent.

Cæterum duos fratres Mahameti, etsi juniores ipso, maiore tamen benevolentia subditi persequerentur. Is itaq; cum de morte patris nuncium accepisset, statim se regni Fessani regem pronunciari iussit: & sine mora cum copiis egressus, Marocum totius regni caput & metropolim pervenit: ibiq; invito licet populo, regiam dignitatem assumpsit, nemine resistente aut impediante, excepto solo fratre Mulcio Banacarc: quem tamen mox regio solio occupato, vita privavit. Alterum verò fratrem Mulcium Hazarem in carcerem coniecit: misitq; certos homines, qui patruum omnium natu minimum (qui tum Tastileti degebat) trucidarent. Sed is intellectis insidiis, fuga sibi salutem quaesivit, Tremissamq; cum regia suppellectile se contulit. Ita manibus sicariorum elapsus, viam ad regnum sibi aperuit. Est enim ille ipse, qui hodie regni decus apud Barbaros obtinet, nomine Mulcius Hametus.

C A P. V.

DE MVLEIO ABDELMELECO, QVI CVM IN TVRCIA DE MORTE Abdallæ fratris, & occupato per fratris filium regno inaudisset: Tremissam cum magnis copiis, per Turcicum Imperatorem suppeditatis venit, & fratris filium devicit.

Mors Abdallæ & reliqua quæ in Mauritania acciderant, citò in Turciam allata sunt

sunt: cumq; Muleius Mahametius ea, quæ ad regni sui statum stabiliendum necessaria sibi videbantur, summa diligentia constituisset: eodem tempore Abdelmelecus eam adhibuit diligentiam, ut paucis diebus Argeliam cum mandatis Turcici Imp. perveniret, quibus continebatur, ut duces quæ necessaria ad bellum essent, ipsi suppeditarent: statimq; paratos & in procinctu habuit quinquies mille sclopetarios, tam Turcos quam AZuagas, viros bellaces, & in re militari armisq; perexercitados. Cum his perrexit Tremissam, assumpto in itinere Alarbum equitatu tanto, quantum consequi & colligere potuit. Tremissam ubi pervenit, perhonorificè est exceptus, ibiq; ut ad bellum necessaria compararet, sex diebus substitit: cumq; fratre juniore Hameto illic invento, duodecim hastatorum millia & quadringentos equites sclopetarios, strenuos & electos milites coegit: sumisitq; secum Tremissa duodecim campestria tormenta, unâ cum commeatu & munitionibus reliquis. His copiis instructus, ad urbem Fessanam occupandam perrexit. Muleius verò Mahametius (qui tum Maroci erat) etsi de conatibus patrui certior fiebat: ita tamen eum contemnebat, eiusq; copias præ sua (quam putabat) potentia despiciebat, ut nulla eius rei cura tangeretur, donec seriam rem agi cerneret, & Abdelmelecum suas copias Tremissa jam coëgisse cognosceret. Itaq; tum festinanter & tumultuariè contractis copiis, intervallo unius leuca seu bis mille passuum à Maroco castra posuit, iussitq; omnes regnorum suo-

rum subditos convenire, rumore sparso, quasi Christianos Tingitanos adoriri vellet, ut hoc illi-
camento alacrius ad arma concurrerent, cum
Barbari nullum belli genus magis exoptent, quam
quod contra Christiani nominis homines geri so-
let. His copiis paratis & tormentis instructis, ag-
men versus regnum Fessanum progredi iussit: &
quoniam maior pars copiarum in itinere se illi
conjunxerat, quam primum Fessam pervenit, ex-
ercitum lustravit, qui tum constabat octoginta
millibus equitum hastatorum & scutatorum, tre-
decim millibus peditum sclopetariorum, & qua-
tuor millibus equitum, cum triginta sex tormen-
tis campestribus. Eo ipso momento, quo Mahame-
tus exercitum contra Abdelmelecum educebat,
nobilis quidam legatus à Sebastiano Lusitania re-
ge, qui illi nomine regia maiestatis auxilium con-
tra Turcas & patrum promitteret, ad eum per-
venit. Sed Mahametius, quod tantum tamq, for-
tem exercitum sibi obedire cerneret, superbior fa-
ctus: Lusitani regis beneficium contempsit. Itaq,
cum patrum Tremissa jam egressum comperis-
set, eo ardore contra eum perrexerit, ut duo exerci-
tus utriusq, inter Fessam & Tremissam sibi occur-
rerent a. d. XVII. mensis Martii, anno M D
LXXV. Prelium commissum est circa vespere-
ram, duravitq, furiosa eius tempestas tamdiu, do-
nec Mahameti exercitus animo pariter & cor-
pore defatigatus terga daret. Eius fuga culpa Do-
gali cuidam ascribitur, qui cum dux Andalusio-
rum esset, cum bis mille sclopetariis lectissimis à
Maha-

Mahameto ad Abdelmelecum defecit. Quod cum Mahometus (qui mille passuum spacio inde post principia sibi cavens & currui insistens, pugnam eminus spectabat) animadvertisset: time-retq; ne idem exemplum ceteri duces secuti, se quoq; cum adversariis conjungerent: è tabernaculo suo statim se proripuit, & cum quingentis equitibus Marocum celeri cursu contendit: militibus hostium furori, thesauris autem omnibus & opibus suis praeda relictis. Ita Abdelmelecus sine multo utriusq; partis sudore & sanguine victoriam obtinuit: & certè decima parte sui exercitus Mahometus Abdelmeleci copias facile funderet & delere potuisset. Abdelmelecus vero tam præclara victoria potitus, satis magnam manum misit, qua Mahometum fugientem insequerentur & in potestatem redigerent: ipse verò à Fessanis magna lætitia exceptus, & Abiis (ut & à ceteris eius regni urbibus ac oppidis) rex est pronuntiatus. Et quoniam febre correptus, afflicta aliquantulum valetudine erat, Fessana in urbe aliquantisper quiescere decrevit, & Turcarum copias, qui sub duce Rabadano regis Argeliani Bassa advenerant, illic exautorare. Is enim hoc in mandatis duntaxat habebat, ut Abdelmelecum Fessam comitatus, in possessionem regni eum immitteret. Ita Abdelmelecus Turcas omnes à se dimisit, exceptis paucis, qui abeuntibus sociis se occultarant, ut novo regi gratificarentur, seq; ei subjicerent, qui erant numero mille & quingenti, omnes strenui & fortes viri. Verum ut ad Muleium Mahometum reverta-

revertamur : quàm primum is Marocum pervenit , bellum renovare , ex omnibus regni partibus milites cogere , apertis thesauris duces sibi conciliare ac milites remunerari , omnes verò sibi donis diligentius quàm unquam antea adungere cepit : id spectans unum , ut ignominiam a patre inustam , præclara aliqua victoria elueret & compensaret. Itaq; ea accuratone & diligentia perfecit , ut decem millia sclopetariorum peditum & mille equites , quanquam tyrones , contraxerit : & hoc amplius triginta millia equitum hastas & scuta ferentium. Quas copias cum viginti quatuor campestribus tormentis in castra eduxit : comatus verò quantum necesse ad eam profectio- nem erat , comparavit. Accidit autem ut & in hoc secundo delectu rex Lusitania ad ipsum cum literis legatum denuò miserit , denuoq; auxilia contra Abdelmelecum patrum obtulerit. Sed idem huic secundo legato , quod primo illi , respon- dit : nisi quòd totum exercitum lustratione insti- tuta in legati conspectu traduxit , ut intelligeret Hispanus , nihil sibi Lusitanis auxiliis opus esse. Abdelmelecus cum Fessa ex morbo se aliquantulum collegisset , & exercitum suum accessione sexi- es mille sclopetariorum , qui à Mahameto trans- fugerant , post abitum Turcicarum copiarum (ut diximus) auxisset : exercitum eduxit eo animo ut Marocum versus contenderet. Audierat enim Mahametum cum ingentibus copiis sub signis esse. Itaq; supra dicta sex millia sclopetariorum & viginti millia equitum hastis & scutis armato- rum

rum, & duo millia Argeliorum, unà cum viginti tormentis campestribus secum raptans, & quia jam meliuscule habere incipiebat, lectica delatus: Maurocum versus ire perrexit. E contra Mahamet^{us} de proposito patruⁱ certior factus, cum copiis quas supra diximus, Maroco summa festinatione & cupiditate dimicandi, proq^{ue} regni jure vel cum vita periculo decertandi, celerrimè egressus est. Et quoniam narratio de acierum ordine & instructione, qua uterq^{ue}, usus est, ad rem quam nobis propositam habemus, nihil admodum facit: brevi totam historiam complectemur. Itaq^{ue}, in valle quadam, tribus à Sala leucis occasum versus distante, secundum maris litora, in loco qui Motha Arrajahana dicitur, castra posuerunt: ubi a. d. 29. Junii tertia pomeridiana hora commissum est pralium atrox & cruentum, in quo modò in Mahameti, modò in Abdelmeleci, partem victoria inclinabat. Sed Abdelmelecus dux prudens & peritus, cum noctem instare, suosq^{ue}, quamvis omni conatu totisq^{ue}, viribus jamdiu incumbentes, victoriam consequi non posse, adversariosq^{ue}, fortiter resistere cerneret: è media cohorte sua egressus, dextraq^{ue}, acinacem vibrans, milites suos ad redintegrandum pralium crebris iectibus compellebat: ipseq^{ue}, inter primos visus, tanta vi, tantoq^{ue}, impetu in hostes se intulit, ut eos turpiter terga dare cogeret, è quibus Mahamet^{us} primus in fugam se vertit. Victoros itaq^{ue}, edita ingenti strage, hoc novissimo pralio plusquam sex millia occiderunt. Abdelmelecus verò fratrem Hame-

tum

tum ad Mahametum persequendum misit, datis illi aliquot equitibus levis armatura: ipse verò paulisper, dum morui sepelirentur, commoratus, cum toto exercitu Marocum versus ire perrexit.

CAP. VI.

DE MVLEIO MAHAMETO E
PRÆLIO IN MONTEM ATLANTEM
fugiente: deq; Abdelmeleci in urbem Ma-
rocensem regio ingressu & tertia contra
Mahametum victoria, qui toties
victus se ad regem Lusitaniæ
ceu patronum con-
tulit.

MVleius Mahametus admissò equo salutem
sibi fuga querens, Marocum septē aut octo
hastatis comitatus, non sine magna suorū infamia
pervenit: cumq; palatium ingressus esset, è thesau-
ris suis quantum commodè auferre potuit, deprom-
sit & quinq; mulis imposuit: & non ultra duas ho-
ras moratus, in fugam se coniecit: patrui turmas,
quæ non procul aberant, evadere approperans.
Cumq; hoc modo paucis equitibus comitantibus
exiisset, laxatis habenis versus montem Atlantem
(quem incolæ Clarium hodie vocant, quiq; sex leu-
cis Maroco distans, asylum & refugium est pro-
scriptorū, exulum & eius regionis latronum) sum-
ma celeritate contendit. Caterum ut relicto in At-
lanis montis jugis Mahameto ad Abdelmelecum
revertamur: Abdelmelecus quamprimum victri-

etiam spolia legit, nulla mora interposita, cum exercitu Marocum perrexerit: ibique octavo à praelio die appellens, tanta pompa ac letitia exceptus est, quanta nulla in regionibus illis antea visa fuit. Magnam enim boni, comis, affabilis & erga pauperes calamitososque pii hominis famam de se excitaverat, eratque aliis pluribus virtutibus eximie praeclitus. Accedebat huc insolentia & tyrannis Muleii Mahameti, quae Abdelmelecum gratiosum & omnibus charum reddebant. Quam primum urbem est ingressus (id quod factum est a. d. XV. Iulii anni eiusdem) politicum regni suum statum constituere cepit: ut non modo fortitudine in armis & rebus gerendis se strenuum, sed etiam prudentia in constituenda Republica eximium demonstraret. Multas enim leges à maioribus suis latas, multaque statuta abrogabat: humanitate summa & comitate insigni erga vasallos utebatur: largitiones etiam ingentes faciebat & congiaria distribuere: id agens ac spectans unice, ut hac ratione famam suam extenderet, & immortalem gloriam supra Reges Africanos, qui ipsum praecesserant, acquireret. Et quanquam ab initio parum gratus erat, praecipue quod populus importunitate Turcorum, quos secum habebat, offendebatur, quod hi (ut sunt superbi, impotentes, intolerabiles & exleges) in summa licentia, multis gravibusque injuriis & violentiis miseros Mauros afficerent: ita tamen paulatim minutatimque eos per binos & ternos à se ablegavit, ut ad extremum non plus quam ducenti remanserint: quos ipsos tamen lon-

gè à suo conviètu & conspectu arcebat, & in ordi-
nem coactos pacificè ac sine noxia agere cogebat.
Qua res effecit, ut subditi in amorem eius conver-
si, solaq; virtutis eius fama commoti, se illi humili-
mè obtulerint, omnesq; debitam obedientiam pol-
liciti sint, ac deniq; ex omnibus provinciis certa-
tim ingentia splendidaq; munera liberalibus &
effusissimis animis attulerint. Erant autem & è
Christianis principibus non pauci, qui ex amicitia
eius singularem letitiam capiebant: ipse verò è
contra animo benevolo eosdem in suam amicitia-
am recipiebat, seq; eorum familiaritate & gratia
florentem, felicem, beatumq; putabat: adeo ut
quotidie multi Christiani nominis passim & un-
diq; in ipsius regnum se conferrent, quos ille plus
adamabat, plusq; amplexabatur, quam ullum a-
liud hominum eas regiones adire solitorum genus.
Nam stipes plurimas erogabat, & admirabili eos
comitate ac humanitate tractabat: multos etiam
sine ullo lytro gratis & inusitata beneficentia libe-
ros dimittebat. Sed in hac ipsius liberalitate et ma-
gnificentia diutius immorari nolo, praesertim cum
hac ipsius praeciosa opera fame publico praconio
per terrarum orbem notissima predicentur. Cate-
rum postquam ad regni culmen pervenit, id pri-
mum omnium egit, ut successorem in regno sibi de-
signaret, legemq; à patre Mulcio Mahameto Xe-
quo latam confirmaret: ideoq; iurejurando ob-
strinxit, & in fidem fratris sui Mulcii Hameti ad-
egit omnes regni procures: etsi is filium tenera ad-
huc ætatis haberet, què successorem sibi nominare
potuisset.

potuisset. *Qua* res licet procere admiratione suspensos tenuit : statim tamen feria & triumpho incredibiles in honorem novi principis & memoriam veteris legis celebrati sunt : & avi Xarisi memoria honorificè per principes usurpata & interpolata est. Interea Muleius Mahametum, qui se in angustias montis Atlantis receperat, ea pecunia, quam secum Marocq extulit, statim milites aliquos, & inter hos aliquos proscriptos & latrones, colligere cepit : adeò ut ad quingentos sclopetarios & ducentos equites, qui hastis & sentis armati erant, contraxerit. *Qua* manu instructus rapinas exercuit, obvios spoliavit, & vicos locaq, Atlantis jugis subjecta infestavit, coëgitq, incolas ut ipsum pro domino agnoscerent, ac sibi cen regi suo tributa penderent. His latrociniis et excursionibus cum spacio septem aut octo mensium usus esset, Abdelmelecus coactus est copias contrahere, quarum opera illam insolentiam compefceret, latronesq, illos è latibulis montium depelleret. Ad eam rem expediendam usus est opera novi principis Muleii Hameti, qui cum copiis ad excursions faciendas in regno Susiano erat. Is & certis in locis Muleium Mahametum vicit, & manum eius tam pedestrem quàm equestrem penè totam delevit, coëgitq, ut se densissimis & impeditissimis resquis occultaret : in quibus ultra annum delituit, frigore, nivibus, aliisq, miseriis & cœli inclementia tantum non enectus : & desperatione vite, insidiarumq, metu (quas illi patris magnis propositis premiis struebat) miserrimè conflictatus. Tan-

C

dem

dem eò necessitate, durissimo telo, adactus est, ut
antea repudiatum fastiditumq, Regis Lusitani
auxilium implorare, eumq, ut ex insidiis & ma-
nibus patris liberatum se, in avitum patritumq,
regnum restitueret, rogare coactus sit. Ea de cau-
sa è monte Atlante nuncium cum literis ad re-
gem Lusitanum misit, iterg, per Mazagam face-
re iussit. Verum ut tutius citiusq, aliquid respon-
si acciperet, constituit relictis Atlantis jugis, Tin-
gim se conferre. Itaq, per sylvas & solitudines mon-
tanas, qua tutissimum & humanis vestigiis mini-
mè tritum iter erat, non sine magnis et certis peri-
culis Penonem pervenit: ubi cum paucos dies sui
colligendi causa substitisset, hinc se Tingim versus
contulit: ibi à præfecto urbis (relictis tamen exte-
rius copiis) intra mœnia humaniter est receptus.
Ex illa urbe è ducibus suis duos legatos cum lite-
ris & duobus Tingitanis nobilibus ad Sebastia-
num regem misit: & ab illo suppetias, quibus in re-
gnum patris restitueretur, petiit. Et quoniam
præfectus Tingitanus non ignorabat se, si comiter
regem Mauritanum tractaret, rem gratam regi
Lusitano facturum: ut hoc iter felicius succederet,
caravellam seu navem instructam cum supra di-
ctis legatis Vlysbonam ablegavit: de quorum pro-
fectione & successu postea dicturi sumus, ubi
prius lectorem de quibusdam rebus
cognitu necessariis admo-
nuerimus.

DE CAUSIS, QUAE MOVE-
 RVNT REGEM SEBASTIANVM, VT
 Muleio Mahameto studeret: deque legatis
 eius & apparatu ad bellum: denique
 de regis Marocensis quoque ap-
 paratu ad idem bel-
 lum,

CVM Rex Sebastianus natura ad armorum
 amorem propensissimus esset, nullam aliam
 voluptatem, quam è bellicis rebus quarebat: quæ
 etiam superioribus annis cum Tingim trajicere
 coëgit, eo animo ut Barbariam in suam potestatem
 redigeret, sed irritò conatu. Nam Muleius Ma-
 hametus (ut supra diximus) bis sibi à Lusitano
 oblata supplicia inani stultaq; confidentia repu-
 diarat: Sed cum Lusitanus hoc temporis articu-
 lo Mauritani regis literis suum auxilium implo-
 rari cerneret: sibi cupido laudis, & imperii ac re-
 ligionis propaganda studioso, occasionem optatissi-
 mam, qua diuturnum suum desiderium explere
 posset, offerri gavisus est. Itaq; legatos Muleii
 Mahameti in Lusitaniam appulsos, magnificè ex-
 cepit, & omnium quorum causa venerant, com-
 potes fecit: literas quin etiam ad Mahametum
 scripsit: operam suam, auxilium, gratiam obtu-
 lit: in paternum regnum restitutionem promisit:
 nullo ex ipsius consiliariis aut proceribus magno-
 perè refragante. Et potuit hac causa esse eius con-
 ventus, quo inter se ambo reges Catholicus & Lu-
 sitanus

stianus Guadalupæ urbe Castiliæ anno 1570.
collocuti sunt. Vbi Catholicus id summo studio
egit, ut Lusitanum à tali conatu & incepto deter-
reret: aut si pertenderet, nec à proposito deduci
posset, ut bonis auspiciis negotium susciperet, rebus
omnibus necessariis ad id optimè comparatis. Sed
cum Lusitanus nullo pacto de sententia dimoveri
posset, rediit domum: quò mox Catholicus legatos
quoq, suos eadem, qua ipse præsens cum Lusitano
egerat, acturos misit. Rex enim catholicus non
ignorabat, quibus viribus, quaq, potentia rex Bar-
barus præstaret, & quàm peritus rerum ac exer-
citatus & fortis esset: quantum etiam apparatus
tanta res requireret, à quo regem Sebastianum
turpiter adhuc inopem esse sciebat. Sed Lusitanus
constans in suscepta semel sententia permansit:
cumq, res ad eam expeditionem necessarias para-
re inciperet, principio delectum militum maxi-
mum in suo regno haberi iussit, misitq, qui in Ger-
mania quinq, millia militum conscriberent: lite-
ras etiam dedit ad equites aliquos Andalusios, ut
veteranos milites evocarent. Adhuc magnum
numerum tormentorum, armorum, cæterarumq,
munitionum comparari & commeatum compor-
tari iussit, & ut hæc omnia commodius transpor-
tari possent, in omnibus portubus regni sui naves
retineri mandavit. Militum, quos è regno suo co-
egit, magnus numerus fuit, sed male instructi, ty-
ronesq, illi erant, & ex colonis, rusticis & turba
ad bellum parum idonea collecti. Quod verò ad
Germanos attinet, ii & tyrones & rei militaris
imperiti

imperiti erant: cumq; Vlysbonam pervenerunt, morbo correpti ultra duo millia perierunt. Venerunt autem ad regem etiam sexcenti Itali, quos Papa subministrarat Comiti Irlandia: qui cum Vlysbona tribus instructis navibus appulisset, regi operam suam condixit, eumq; in bellum sequi promisit. Caterum rex ipse publicè per tubicinem in toto regno promulgari iussit, ut omnes vasalli nobiles, nisi redditibus, censibus & omnibus privilegiis à rege sibi concessis, spoliari mallent, se ad bellum comitarentur. Rebus igitur necessariis exercitui comparatis, & navium lemborumq; satis magna copia coacta: tormenta, com meatum, munitiones, equos & alia necessaria navibus imponi iussit, ut cum D. Ioannis Baptista dies (quo domo exire decreverat) appropinquaret, nihil esset quod exercitum, quò minus navibus imponeretur, & in Africam transportaretur, impedire aut retardare posset. De his rebus cum Abdelmelecus rex Mauritania jam admonitus, & quid contra se rex Lusitanus conaretur, certior factus esset: magnum ex eo cepit dolorem: non tam quòd à rege Lusitania sibi metueret, quàm quòd erga Christiana religionis homines benè affectus erat, Africam miseri regis Lusitani (etsi triplo maiores secum copias, quàm habebat, adduceret) sepulchrum futuram animo praevidebat. Itaq; in hanc sententiam verba cum fecisse constat: Regem Lusitanum diligenter debere cogitare, quàm justam legitimamq; in Africam proficiscendi causam habeat. Nam quòd is regnum ei eripere, ad quem jure successionis

pertineat, & ad Nigrum transferre conetur, idq;
nullo Christiani orbis cum emolumento aut utili-
tate: id Deum Opt. Max. qui justus iudex sit, ne-
quaquam permissurum. Verum enimverò Abdel-
melecus, ut homo acuti ingenii, summaq; in eius-
modi rebus diligentia & providentia, cepit & ipse
se ad bellum parare, & de rebus ad id necessariis
cogitare. Tabernacula igitur in campo una leuca
à Maroco distante extendi: bellumq; per totū su-
um regnum publicè Christianis denunciari iussit:
quæ res peroptata accidit Mauritanis omnibus.
Magnum quinectiam numerum tormentorum,
ac præcipuè campestrium: commeatus item, & e-
quorum camelorumq; (qui necessaria exercitui
portarent) infinitam copiam parari mandavit.
His sic provisus, cum audisset regem Lusitanum
jam jam naves conscensurum & Arzille appulsi-
rum: ipse quoq; Maroco a. d. XVI. Aprilis ma-
gno populi plausu, infinitoq; ferè hominum comi-
tatu, in castra egressus, exercitum suum sub pelles
duxit: sub quibus ultra XX. dies moratus, reli-
quas copias expectavit. Hinc parvis itineribus Ar-
Zillam versus sub signis agmen promoveri cepit:
utq; cum iis copiis, quarum in expectatione erat,
commodius se conjungere posset, ad Temo-
cenam, quæ est in regni sui fi-
nibus, paulisper sub-
stitit.

DE REGIS LVSITANI EX
VRBE VLYSBONA EGRESSV: ET
eiusdem apud Gades, Tingim & Arzillam
appulſu: deſque conditionibus ſeu pa-
ctis inter ipſum & Muleium
Mahametum in-
itis.

R Ex Luſitanus verò, cum jam toto animo in
bellum propenderet, priusquam naues con-
ſcendit, per totum ſuum regnum ſupplicationes &
preces publicè fieri juſſit, ut his auſpiciis felicem à
Deo ſucceſſum, & contra hoſtes victoriam impe-
raret. Ad eam rem ſanctiſſimus pater Papa
Rom. (ut miſericors eſt, & nihil aliud quam ſa-
lutem ſuarum ovium ſpectat) regi miſit legatum
& commiſſarium ſuum cum largiſſimis (ut ipſe
appellat) indulgentiis, gratiis & privilegiis, pro
omnibus qui tam ſancta expeditioni ſe conjunge-
rent. Tandem ad diem D. Ioanni ſacrum (quo
die magna celebritate res ſacra & pompa pontifi-
calis Vlyſbona publicè traducitur) totus exerci-
tus navibus eſt impoſitus: poſtridie verò ſummo
mane Rex Sebaſtianus (nominatis prius ſeptem
regni præſectis ex primoribus, quòd Cardinalis,
patruus eius, adminiſtrationem regni recuſaſſet
eò quòd rex ad preces ipſius de expeditione deſi-
ſtere noluiſſet) oram ſolvit, & in altum vela de-
dit a. d. XXVI. Iunii una cum X. aut XII. na-
vibus, quas Galeatas vocant, in quibus tota prope-

modum eius regni nobilitas vehebatur. Maris
tum summa malacia & tranquillitas erat. Clas-
sis totius exercitus Vlysbona solvens, constabat ad
summum ex maiorum minorumq; navigiorum
mille & trecentis velis: aspectu adeo jucunda, ut
multi talem classem ex eo tempore se non vidisse
dicerent: cumq; haberet secundum ventum, Ga-
dibus appulit, pridie Divorum Petri & Pauli.
Rex summa gratulatione & latitia populi sui ex-
ceptus, ibi substitit per XV. dies, ut res necessarias,
quæ sibi deerant, compararet: utq; aliquot Hispa-
norum copias, quæ ex Andalusia adducebantur,
secum una transportaret. Quibus rebus confectis,
navem conscendit a. d. VII. Iulii, & Gadibus
solvens Tingim versus cum Galcatis navibus per-
rexit, reliquam verò classem Arzillam versus ire
iussit. Nam Mahametum, qui Tingi ipsum solici-
tè & attentè expectabat, alloqui prius volebat.
Itaq; a. d. IX. Iulii regie naves Tingi appulerunt,
sed priusquam rex in portum perveniret, in eius
occursum cum myoparone misit Mahametus fili-
um suum, puerum X. fere annorum, nomine Mu-
lcium Xequum, qui humaniter & comiter à rege
est salutatus. Verùm Rex in terram egressus, ma-
jora benevolentia & amicitia signa Mahameto
exhibuit, suamq; operam & auxilia ad restituen-
dum eum in regnum, liberalissimè obtulit. Ma-
hametus in regis conspectu constitutus, etsi jam
antea satis eum & per literas & per nuncios de
sua voluntate certum fecerat: ut tamen rebus su-
is intius consuleret, tum temporis uberius proli-
xiuq;

xiusq³, coram, quid animi haberet, eidem oratione
sua aperuit, docuitq³, quomodo patruus Abdelme-
leus regnum sibi per vim extortum, Turcicis vi-
ribus & auxiliis innixus usurparet. Addebat
etiam illud, Abdelmeleci vasallos & clientes nihil
aliud agitare & in eo totos esse, ut ipso per insidias
caso, aut ad minus derelicto, ad se transirent: deq³
eo se sine intermissione à proceribus regni literas
accipere asseverabat, quibus literis pollicerentur
se in castra ipsius transituros, quàm primum vel
parvis copiis ipse contra hostem moveret. Quin-
etiam regi Lusitano persuadere volebat, ne ma-
nus cum Abdelmeleco confereret: sed ut castra
tantum metaretur: quod si fecisset, futurum ut mi-
lites patrum sui statim imperata sint facturi. Pro-
misit insuper se duos aut tres portus maris Barba-
rici cum eorundem agris traditurum: & in eius
rei fidem obsidem dedit filium suum. Lusitanus
qua erat liberalitate & magnanimitate natura,
in omnibus istis Mahameti fidem habuit, & sine
ullis conditionibus, pactis & fidejussoribus, petiti-
oni eius assensit. Hinc cum Mahameto Arzillam,
ubi exercitus eius harebat, perrexit: ibi Muleius
Xequus copiis patris præerat, secumq³, habebat
Tingitani presidii peditatum & equitatum. Rex
Arzillam pervenit die dominico, qui erat XIII.
Iulii, & quàm primum è navi in litus egressus est,
tormenta, commeatum, & reliquum apparatus
bellicum exponi iussit: quatuor verò navigia in-
structa MaZagam misit, ut Muleium Xequum
obsidem suum eò deducerent. Castra verò propè

muros ArZilla poni; eaq; aggeribus & fossis, ut tutius securiusq; illic tenderet, circumvallari iussit.

CAP. IX.

DE ABDELMELECO, QUOMODO IS IN ITINERE MORBO CORREPTUS SIT, & quomodo se cum fratre conjunxerit: de lustratione totius exercitus ipsius: de copiis regis Lusitani, eiusq; ex ArZilla egressu.

SEd, ut ad Abdelmelecum revertamur: quam primum is Temocenam pervenit, magna multitudo equitum hastatorum, scutatorum, aliaq; multa copia se cum illo conjunxerunt. Verum triduo postquam eo pervenit, in gravem morbum incidit: cuius tamen causam nemo tum intelligebat. Sed paulo post cum ingentem stomachi cruciatum sentiret, facile intellectum est eum inde ortum habuisse, quod lac avide gustasset, quod illi in ventriculo coagulatum, concretumq; coisset. Id ut ejiceret, bidui & tridui fere inani conatu vomitum elicere (ut in more habebat) tentavit: & sic tandem magnam casei turundam rejecit, qua illi ventriculum adeo debilem & languidum reddidit, ut deinceps nullum cibum concoquere potuerit. Ad quod malum accessit etiam durum parumq; commodum hospitium, quod morbum auxit. Caterum quamprimum audivit, regem Lusitanu Gadibus solvisse ut ArZillam navigaret, quanquam tum temporis

temporis parum bellè haberet, agmen procedere, et
Arzillam versus tendere jussit, ipse in lectica dela-
tus. Iamq; aberat ab Alcazara (ubi eum frater
cum exercitu expectabat) non longius itinere uni-
us diei: cui cum appropinquaret, adventus ipsius
in argumentum latitiae crebris tormentorum icti-
bus exceptus est. Positis tandem illic castris & ta-
bernaculis tensis, coactus est aliquot dies ibi com-
morari, tum ut reliquas copias expectaret, tum ut
vires suas morbo debilitatas recuperaret. Itaq;
quàmprimum copia ille, quas expectarat, advene-
runt, totum exercitum lustravit: invenitq; XV.
millia peditum sclopetariorum: è quibus V. millia
veteranorum lectissimorum erant: reliqua pars,
tyronum & nullius experientiae. Accedebant duo
millia Argoletorum, & XLII. millia Alarbum
hastatorum equitum, scutis rectorum. Habuit &
XXVI. tormenta campestria, optimè instructa, et
artifices tormentarios in eo negotio valde dextros
& agiles. Totus insuper exercitus commeatu egre-
giè instructus, ac militibus stipendia liberaliter
distributa & diribita erant: quod precipuum in
re bellica opus est, & quod imperator ac dux belli
in primis curae habere debet. Miles itaq; singulis
mensibus aureo nummo solvebatur: itaq; omnes eti-
am pro Abdelmeleco extrema pati & vitam su-
am pro illo impendere parati erant: exceptis equi-
tibus Alarbum, quibus parum fidebat, utpote non
ignarus eos perfidiae plenos esse, nec ulli alii rei stu-
dere quàm ut pradas agant & rapiant undecunq;
possunt. Et ut brevi complectar, in nullis plus con-
fidentia

fidencia habebat, quàm in quinq, millibus illis veteranorum sclopetariorum. Sed quod maximè omnium Abdelmeleco doluit, hoc fuit, quòd in tanto tamq, periculoso praelio (in quo, nisi de regni summa periclitari vellet, ipsum presentem adesse & administrare oportebat) se tam debilem, morboq, adeò fractum sentiebat: quem morbum Canicula ardentissimum sydu augebat. Tenuit se illic per octo aut novem dies, donec rex Lusitanus nolentem etiam, progredi et castra ad Alcazarem quibir ponere coëgit. Interea rex Lusitanus Arzilla egressus, & ad iter accinctus, totum & ipse suum exercitum lustravit: in quo (ultra mille stipendiarios, quos in classis prasidium reliquerat, & duo millia qua Maxagam miserat) habuit quatuordecim millia peditum & duo millia equitum, magna ex parte armis rectorum. Adhac accedebant tria millia fossorum & plus quàm mille auriga, & infinita ferè multitudo lixarum, calorum, servorum, aliorumq, mancipiorum Mauro-rum, mulionum, mulierum & Amazonum (quas Galli per jocum filles de joye, id est, filias gaudii appellant) Nam eò res devenit, ut bellum à nobis sine eiusmodi limacibus non videatur geri posse. Ita ut tota illa incondita impedimentorum turba, Viginti sex hominum millia superarit. Prater hac habuit triginta sex tormenta campestria: item mille & centum currus plenos storeis, vasis & suppellectile pro nobilibus duntaxat. Potuit quidem maiores copias in eam expeditionem ducere, tam ex Hispania quàm ex aliis regionibus: sed verbis

Muleii Mahameti, qui Abdelmeleci exercitum ad se transiturum dicebat, fidem habens, multos Hispanos, qui Gadibus naves ascendere cupiebant, exautoravit: multò verò facilius illis missionem dabat, qui sub prætextu adversa valetudinis domum remitti petebant. In exercitu qui eum sequebatur, erant tria millia Germanorum, sexcenti Itali, duo millia Hispanorum, sexcenti milites Tingitani, duo millia velium & quingenti, quibus præcipuè confidebat. Reliqui erant Lusitani. Habebat & duo millia equitum: quorum dimidium Tingi abduxit, reliquum erat ex nobilibus Lusitanis & eius vasallis ac clientibus. Et harum copiarum maior pars parcè & malignè stipendia accipiebat, inopiaq; & aliis multis malis laborabat. Iam enim commeatus deficere incipiebat, qui tam parcè illis distribuebatur, ut multi fame extincti sint. Cuius rei causa omnis penes præfectos annona fuit, qui plerunq; malis suis artibus principes & duces belli in extremas calamitates conjiciunt. Quòd verò omnium pessimum fuit, maior pars exercitus è tyronibus constabat, qui sine peritia rei militaris erant, nec unquam aciem aut castra aspexerant. Vt omittam octo millia illa, quæ hastis prælongis erant armata: quo genere militum ad bellum in Barbaria gerendum nihil est inutilius aut ineptius, ut eventus postea docuit. Lustrato per regem Lusitanum exercitu, Abdelmelecus jam Alcazaram pervenit cum exercitu furoris & ira pleno. Quæ res effecit, ut consiliarii regem Lusitanum rogarent, ne ullo modo

modo acie decertaret, cum adversarii ipsum copi-
is & viribus longè vincerent: sed potius ut Laris-
sam cum exercitu tenderet, locumq; illum muni-
tum caperet, rebusq; suis praevideret & consule-
ret. Cæterum Abdelmelecus, cum per singulas ferè
horas, quæ in castris Christianorum gererentur,
per exploratores cognosceret: & quam invalide
Lusitano copia, quamq; frigide omnia administra-
ta essent, compertum haberet: ideoq; miserum re-
gem in juvenili ætate constitutum, ruina proxi-
mum videret: omnibus modis id egit, ne manum
conferere cogeretur, quòd alioqui erga Christia-
nos non pessimè affectus esset. Itaq; per certos quos-
dam homines, eosq; ferè mercatores, clanculum &
occulte id operam dedit, ut Lusitanum de dolis &
fallaciis Mahameti (qui eum in hac pericula,
tamq; præsentem ruinam & vitæ discrimen ad-
duxerat) certiores redderet. Quanquam autem
hæc Abdelmeleci consilia Lusitano non ignota e-
rant, & ipsius consilarii eadem quæ Abdelmelecus
suaderent, atq; a proposito deducere conarentur:
ille tamen omnia ista pertinaciter contempsit, non
tantum ut ardens pugnandi desiderium exple-
ret, viresq; suas & spiritum magnanimum peri-
clitaretur: sed etiam quòd Mahameti promissæ,
quibus plurimum fidei inesse credebat, præcipue
consideret. Et ut in pauca conferam, consilarii ipsi-
us id unum agebant, ne rex ad pugnam descende-
ret, sed ut potius Larissam contenderet: tantumq;
increpando urgendoq; perfecerunt, ut suis moni-
tis rex tandem manus dans Larissam versus ten-
dere

dere decreverit. Itaq, classe Larissam versus navigare iussa, ipse pedestri itinere a. d. XXIX. Iulii (qui erat dies Martis) ArZilla egressus, per tri-
dium itineribus parvis (propter multitudinem
impedimentorum qua eum sequebantur) factis,
die Veneris substitit, quod aliquid subsidii ArZilla
expectabat. Die Sabbathi summo mane castra
movens, tandem juxta fluvium urbis Larisse
(quod Mazaga dicitur) consedit, custodiis & sta-
tionibus (propter Mauros passim palantes) pro
more suo diligenter dispositis.

CAP. X.

DE REGE ABDELMELECO
IN PLANICIEM ALCAZARÆ PER-
gente: deque Lusitano, qui omisso itinere
versus Larissam, obviam ivit hostitam pro-
pinquo: deque Abdelmeleco ad pu-
gnam se parante die Solis, qui
erat tertius Augusti
mensis.

ABdelmelecus eo tempore valde debilis &
infirmus valetudinis AlcaZara harena, etsi
intellexit Lusitanum ArZilla egressum, ad fluvium
Mazagam consedis: loco tamen se movere
noluit, priusquam ex exploratoribus cognovit ho-
stes AlcaZaram versus tendere. Volebat enim per-
mittere, ut hostes Larissam occuparent, existi-
mans fore ut Lusitanus ea occupata contentus, il-
luc rediret unde venisset. Sed cum comperisset ho-
stem

stem die Sabbathi mane ulterius pergere: eodem tempore & ipse castra movit, & per Alcazaram Arzillam versus ipse quoq; perrexit. Cumq; paulo plus dimidio leuca, hoc est, ultra mille passus cum agmine progressus esset, castra in excelsa quodam colle posuit, in conspectu Lusitanorū, qui leuca spacio à dicto tumulo aberant, & in ampla ac jucunda planicie castra metati erant. Cum secundum decursum Alcazara fluvii esset, iussit in ipsius ripa tentoria erigi; non procul à confluente alterius fluvii qui Larissam petit. Meridie jam transacto, in tentoriis cum exercitu ab astu se refecit, in lectica ipse requiescens. Interea misit aliquot equites, qui certiora de hostibus referrent: pro stationibus verò collocavit milites, qui prohiberent ne è suis castris aliqui ad Lusitanum & Mulcium Mahametum transirent. Rex Lusitanus cum die Sabbathi mane ad fluvium Larisse pervenisset, ibidemq; castra sua posuisset, eo in loco ubi ad traducenda tormenta vadum reperiri posse existimabat: sed eo animo esset, ut Larissam progrediretur: ibi Mahametus homo callidus, maliciosus & fraudulentus, cum cogitaret fore ut, si Lusitanus Larissam urbem ingrederetur, & Abdelmeleci vires ac exercitum potentissimum consideraret, is infecta re domum rediret, & se ibi desertum solumq; inimicis suis objiceret: constituit ea die cum Lusitano colloqui, eumq; de itinere, quod Larissam versus proposuerat, dehortari: & ut id commodius conficeret, cœpit callidis verbis commemorare, quòd multi Mauri equites ad se

ab Abdelmeleco transiissent, quodq; reliquus exercitus idem facere conaretur. Quod si ipse Larissam iret, fore ut quasi timidus & in fuga salutem ponens ab omnibus reprehenderetur. Esse Abdelmelecum nudum ab amicis: ab ipso enim milites duriter tractari: eosq; ideo ipsi tendere insidias, ut eum aut trucident, aut in ipso negotio deserant. Melius & consultius esse, ut Alcazaram versus eat, praesertim cum hostis, qui in occursum veniat, nequaquam tantum audaciae sibi sit sumpturus, ut ipsum impedire conetur. Adjecit & alia argumenta ad propositum facientia: quibus id effecit, ut Lusitanum de Larisseo itinere deduxerit: & sanè alioqui in tanta hostis propinquitate pergere difficile illi erat. Die dominico, summo mane Lusitanus castra movit, & secundum ripam fluvii ascendit, ut ad regiam viam, quae Arzilla Alcazaram versus ducit, perveniret: cumq; vadum quoddam invenisset, constitit, mandavitq; fossoribus, ut in posterum diem viam paratam haberent. Abdelmelecus verò Lusitani consilio intellecto, tuba signum dari iussit, ut omnes se armarent. Itaq; jam meridie transacto, è castris egressus, relictoq; iis firmo praesidio, perrexit contra hostem ire. Cumq; fere per quartam partem leuca progressus esset, constitit & exercitum suum respirare iussit, donec cognosceret, quid hostis, qui circiter dimidiam leucam inde aberat, in animo haberet. Nam (ut diximus) Abdelmelecus constituerat praelio prius non decertare, quam id Lusitanus prior expeteret. Lusitanus cum secundum Larissae

D fluvium

fluvium castris positis, audiret hostem contra se
tendere, coactus est castra movere & aciem dis-
ponere: non quidem praeliandi causa (quia vado
fluvius transiri sine summa difficultate non pote-
rat, & erat magna manus Maurorum, qui levi-
bus praeliis continuè eius milites laceffebant) sed
ut se muniret, & fluvio ingenti instar muri contra
hostem uteretur. Hoc pacto duo illi exercitus, dum
alter ab altero praelii initium expectat, per reli-
quum illius diei se continuerunt. Itaq, cum jam
ad vespersceret, & Abdelmelecus Lusitanos se lo-
co non movere videret: etsi principes eius ad con-
ferendas manus & signum praelii dandum urge-
rent: quia tamè nox instabat, receptui cani iussit,
et in castra exercitum reduxit. Sed tamen per tu-
bicinem in castris edixit, ne quisquam illa nocte
arma poneret: quin & excubias, sicut & praece-
dente nocte duplicari iussit, ne quisquam è castris
suis ad Muleium Mahametum transfigere pos-
set. Et certè hac custodia causa fuit cladis Maha-
meto: quandoquidem nemo è statione sua aut ta-
bernaculo discedere ausus est. Ipse interea Abdel-
melecus toto animo in praelium intentus erat. Nam
cum eo die multos equites & abjurata fidei homi-
nes è castris suis fugisse inaudisset: metuereq, ne,
si certamen postridie detrectaret, maior pars exer-
citus deficeret: non amplius cessandum sibi ratus,
ulterius progredi et Martis aleam tentare decre-
vit. Itaq, in castris per tubicinem significari iussit,
ut omnes essent in procinctu, vel vivere vel mori
parati.

DE CONCIONIBVS REGIS
SEBASTIANI ET ABDELMELECI,
quas ad milites suos habuerunt, prius-
quam ad manus venirent, & de
ordine duorum exer-
cituum.

Postquàm Rex Lusitanus hostes se in castra
recepisse vidit, idem & ipse fecit: rursusq; eo
in loco, unde paulò antè egressus est, castra posuit.
Ea nocte habito principum concilio, constituit po-
stero die (qui dies Luna erat) copiam pugnandi
hosti dare. Et constans omnium fama est, Muleiñ
Mahametum consilium dedisse, ut postridie sub
vesperam pralium cieretur: non tam quòd hac
ratione milites Abdelmeleci commodè ad se trans-
ire possent, quàm quòd is propter noctis obscurita-
tem, nullum remedium habere posset, si qua confu-
sio in ipsius exercitu oriretur. Hoc consilium, ut bo-
num et salubre, ab omnibus approbatum fuit: idcoq;
eadem nocte rex Lusitanus in castris mandari
iussit, ut postridie (qui erat dies Luna) prima lu-
ce tormenta & impedimenta per vadum celerri-
mè traducerentur. Nam si diutius morati fuif-
sent, adversarii hand dubiè ipsos transitu prohi-
buissent: quæ etiam causa fuit, cur pralium non sub
vesperam, sed maturius commissum fuerit. Vado
ad transeundum preparato, statim exercitus tra-
ductus est, & castra ultra fluvium posita sunt:
rexq; simul ordinare aciem, explicare catervas

Et tormenta locis idoneis collocare cepit. Prolixam verò ad milites concionem habuit, exhortatusq; eos est blando & comi sermone, adhibitisq; argumentis efficacibus, ut se ad honorem Dei & incrementum religionis Christianæ periculis fortiter offerrent: promittens ingentes opes, gratiam, honores & privilegia: deq; victoriā spem optimam habere iubens, præsertim Deo adjuvante, in quo omnem spem fixam haberet. Idem faciebant pro virili purpurati, qui regem in hanc expeditionem secuti erant: nimirum Episcopi Conimbricensis & Portuensis: commissarius item Pontificius & alii plures sacri ordinis homines. His adhortationibus totum antemeridianum tempus consumtum est, resq; extracta ad horam undecimam usq;. Abdelmelecus è contra animadvertens Christianos instructo agmine accedere: ipse quoq; per castra signum dari iussit, ducibusq; mandavit, ut milites è castris eductos, in ordinem quem præscripserat disponerent, ut inferius in peculiari tabella videre licet. Et quoniam ob morbum membris debilis, colore pallidus & luridus erat: & propter paralytim brachiis nullo modo uti poterat: qui prudentiores cautioresq; è consiliariis erant, dehortabantur ne ipse præsens in prælium ire vellet: quibus ille neutiquam consentire volebat: sed cum plusquam viginti diebus equum non ascendisset, lecticam suam relinquere constituit, seq; sumtuosissimis vestibus Attalici textus indui, & infinitis gemmis preciosissimis, ac margaritis ex Oriente optimis ornari iussit: equumq; generosum & validum conscendit.

Hoc modo ad pugnam paratus, suos adhortari ad fortitudinem cepit, honores & munera militaria opima pollicitus, iis qui se viros gessissent, & strenuè suum munus administrassent. Quibus verbis & pollicitationibus milites suos, in quorum conspectu ob adversam valetudinem diu non venerat, ita animavit & incendit, ut Martem spirare & instar leonum in praliu ruere visi fuerint. Et quam principio aliqui fuerint, qui ipsi insidias tendere & transfugere conati sint: hic tamen commutata sententia, summa cum reverentia se illi adeo subjecerunt, ut pedibus eius oscula etiam ferre non sint dedignati. Tandem exercitu in modum semicirculi seu menisci disposito: & in tres acies diviso, agmen promoveri cepit eo ordine què hæc tabula demonstrat. Viæ signum * Dextrum cornu (quod litera Q signatum est) ducebat princeps frater Abdélmeleci, qui secum habebat mille sclopetarios equites lectissimos, numero binario notatos. Habuit autem etiam decem millia equitum hastatorum & scutatorum, qui per circulos O sunt designati. Sinistrum lunula cornu (quod litera P signatum est) tenuerunt duo millia Argoletorum & decem millia equitum hastatorum, eodem ordine quo in dextro cornu. Hos ducebat prorex Mahametius Zarep. Tertia acies numero quaternario signata (quæ princeps acies erat, & in qua Rex Abdelmelecus constiterat) peditibus sclopetariis munita erat. Hos sequebatur rex pratoria cohorte ducentorum abjurata religionis militum circumdatus, qui o-

innes Alabardis seu bipennibus armati erant. In
subsidiaria verò acie habebat viginti millia equi-
tum, per bina millia divisorum. Tormenta autem
campestria inprimis scite collocari curavit, quæ
(ut supra dictum est) numero viginti sex erant.
Ceterum Lusitanus aciem suam longè aliter in-
struxit, ut sciagraphia adjecta indicat. Nam to-
tum exercitum divisit in quatuor acies quadra-
tas. In dextro latere, ubi litera B est, primum ag-
men erat velitum et militum Tingitanorum, eosq;
ducebant Alvarus Peresius de Tavora. Sinistram
aciem seu mediam tenebant Germani et Itali, qui-
bus imperabat Marchio Irlandia. Tertiã sub-
sidiariam aciem (quæ litera C signata est) occupa-
rant Hispani & aliquod Itali, quorum dux erat
Alonzo Aquilarius. Quartam aciem (quæ litera
D notata est) tenebant milites Lusitani, sub impe-
rio cuiusdam nobilis eius nationis, cui nomen Lu-
dovicus Cesar. Singulæ acies habebant fere tria
millia militum, sed aliæ plures, aliæ pauciores. Im-
perator verò totius exercitus erat Duartus Mene-
sius, præfectus urbis Tingitana. Ultra has copias ha-
bebat dextra millia equitum optimè instructa &
per quingenos divisa, tam in primo agmine & sub-
sidiaria acie, quàm in utroq; cornu, ut videre est
per literas B. In medio totius exercitus, impedi-
menta, imbellis turba, currus & servi erant collo-
cati, ut linea hinc inde ducta ostendunt. Muleius
autem Mahametus consistebat ad dextrum aciei
latus, cum paucis militibus suis, quorum summa
erat ad quingentos sclopetarios & sexcentos hasta-
tos,

ros, ut ostendit litera F. In fronte aciei collocatas
rex triginta sex tormenta campestria. Dispositi
itaq; duo illi exercitus hoc modo per ingentem &
amplam planiciem incedebant: qua ita patens &
nuda erat, ut nulla neq; arbor, neq; herba, neq; la-
pis intra duas leucas circū circa aequalibus a me-
dio radiis occurreret. Acies Maurorum à sinistra
fluvio Alcazare vice aggeris aut munitionis lecta
erat: Lusitanus à tergo Mazagam, qui Larissam
petit, habebat. Duabus autem de causis Alcaza-
rem fluvium, priusquam intra telijactum esset, at-
tingere cupiebat: primò, ut adversarius ventum
auferret, deinde ut fluvio pro muro aut aggere u-
teretur. Sic Christiani ventum satis secundum
habuerunt, etsi solis radii à principio iis adversi
erant. Nam postea & quidem subito serenitas in
obscuritatem mutata est, & tempestas adèò nubi-
la evasit, ut Solis radii nihil molestie attulerint.
Ceterum cum hi duo exercitus ita inter se propin-
qui essent, ut intra jactum plumbea pile essent: cir-
ca undecimam horam cum semisse Mauritani
gradum sistere & tormenta dirigere ceperunt.

CAP. XII.

DE PVGNA INTER REGEM
LVSITANVM SEBASTIANVM ET AB-
delmelecum: in qua Maurorum acies ter-
rupta est: deq; mortuo ex vi morbi

Abdelmeleco: & victoria exer-
citus eius post mortem
ipsius.

AD diem IIII. Augusti (qui erat dies Luna) anno salutis nostræ 1578. prælium est commissum inter duos reges, circa horam 12. & Mauri quidem primi tormenta in Christianos ejaculari ceperunt: sed vix tres globos miserant, cum ecce Christiani eòdem suis quoq; pilis excipiunt: Statimq; Sclopetarii milites ab utraq; acie parvas pilas instar nimbi aut grandinis effuderunt, tam horrida, furiosa, terribiliq; tempestate, ut præ tremore, quem tormentorum fragor & boatus excitabat, terra in profundum demergi, & cælum igni, flammis, fulgure, tonitribus tormentorum exardescere videretur. Exoneratis igitur tormentis, quingenti armati ex prima acie, quos dux de Avero ducebat, in sinistrum Maurorum cornu (quod litera P signatum est) impetum fecerunt, eosq; dissiparunt, & occisis plurimis, ceteros in fugam compulerunt, ita ut plusquam octo millia sclopetariorum & viginti millia equitum hastatorum, (qui Alarbes erant) locum reliquerint, ac ferè per viginti leucas diffugientes, de victoria Christianorum passim rumorem sparserint. In hoc primo congressu Mauri duo equestria vexilla amiserunt, non sine magno Abdelmeleci dolore, qui cum in medio agmine equo insideret, videretq; suos turpi fuga laxè & effuse ad eò indulgere, ita ira & furore incensus fuit, ut quantumvis præ imbecillitate in equo vix sedere posset, ipse tamen ea partè, qua ipsius milites fugiebant, hostem aggredi conatus sit, ut inclinatum illud fœdeq; disjectum cornu repararet & fugientes sisteret, contraq; hostem

stem rursus converteret. Sed pratoria cohortis milites, cum extremam ipsius debilitatem non ignorarent, sublati habenis quominus ulterius progredi posset, prohibuerunt. Cum verò ut illorum manibus se eriperet, manum capulo admoveere conaretur, paralyti brachia manusq; diriguisse animadvertit. Qua ex re tantum dolorem animo sensit, ut amissa voce in lunatum ephippii arcum procumbens, nihil amplius prolocutus sit, quàm ut se ocys promoverent: id quod factum est, sed ad jactum duntaxat lapidis. Interea pratoriani regem ex equo sublatum, in lecticam reposuerunt, ubi intra semihoram animam exhalavit. Mors tamen eius callidè dissimulata est, dum eum quieti se tradidisse fingerent. Verum enim verò etsi Christiani Mauritanos primo congressu vicerunt: reliquus tamen regis Lusitani exercitus hac victoria vix nescivit. Cum enim nemo esset qui, quod facto opus esset, juberet, aut subsidiarias cohortes in auxilium submitteret: pulcherrimam victoriam e manibus elabi permiserunt: ipsi verò victores milites se eò recipere coacti sunt, unde exierunt. Mauri itaq; cum hanc suorum stragem à solis equitibus editam cernerent, neque quenquam esse qui illis suppetias ferret: mille Argoletos, aliosq; plurimos emiserrunt, qui Lusitanos antea victores ea vi in fugam conjecerunt, ut in mediam aciem peditum irruentes, ingentem totius Christiani exercitus perturbationem effecerint. Res in ipso conspectu et praesentia regis gerebatur: qui suorum suasu hactenus in curru commoratus, quàmprimum suo-

um fugam & inclinationem conspexit, subito in equum armis viridibus & contra quamvis vim validis protectum insiliit: & in hostem duce de Avero aliisq; armatis comitatus, sese intulit. Quamquam autem tanta vi, tantoq; impetu in adversarios invehitus est, ut denuò illorum aciem ruperit: cum tamen exercitus Mauritanus loco non cederet, coacti sunt hi equites (qui vix quingenti numero erant) pedem referre: quos Mauri tanto impetu insecuti sunt, ut magno eorum numero occiso, reliquos cœgerint se peditibus inferre, ita ut præcipiti & vecordi consternatione irruentes, pondere equorum plurimis protrititis & elisis, magnam suorum stragem ediderint. Interea tota Mahometani exercitus copia de monte decurrentes, ingenti impetu Christianorum aciem invadere ceperunt. In eo conflictu dux De Avero & multi alii nobiles strenuq; viri ceciderunt: quin & regis Lusitani equus, ipso tamen salvo & illaso, trajectus: & tormenta, quæ in hoc pralio Christianis nulli usui fuerunt, capta sunt. Quod ad dextrum Maurorum cornu attinet, eius milites jam inde ab initio pralii nunquam cessarunt grandines pilarum in Christianos effundere: quin & loco se moventes, lunata aciei figura perpetuò conservata, exercitum regis Lusitani circumire, & ab latere postremam aciem adoriri ceperunt. Itaq; Rex (qui jam alium equum recentem conscenderat) animadvertens postremam aciem opus habere subsidio, quingentis armatis, qui huic officio destinati erant, secum raptis, Mauros, qui sub

sub Muleio Mahameto fratre Abdelmeleci
erant, tertium adortus est: quos ita perterruit, ut
coëgerit eos ultra dimidiam leucam cedere, occi-
sis plurimis, reliquis autem dissipatis. Sed cum so-
lus esset, neminemq; haberet qui se sequeretur:
magno cum dolore, contraq; animi sui voluntatē
ad exercitum suum se conferre coactus est, ut ni-
mirum ad cladem suam vivus vidensq;, ut dici-
tur, proficisceretur. Nam Mauri in sinistro cor-
nu, postquam Christianorum tormenta ceperunt,
victoriam persequentes, etiā illos Christianos, qui
ad ripam fluvii erant, ita devicerunt, ut in Mu-
leii Mahameti (qui inter Christianos & fluvium
se tenebat) stationē inveharentur, miserandamq;
stragem Maurorum, qui cum eo erant, ederent:
& multi ex eius militibus in turmas Christiano-
rum se proriperent. Mulcius Mahametus fuga sa-
lutem quarere volens, cum fluvium Larissæ cæno-
sum & palustrem vado transire vellet, ab equo
(qui è luto eluctari conabatur) strato excussus:
& cum natandi imperitus esset, submersus & a-
quis extinctus est. Victores Mauri, victis insisten-
tes, ad stationem Muleii Hameti fratris Abdel-
meleci pervenerunt, ibiq; principes Christianos
undiq; inclusos & quasi indagine cinctos partim
occiderunt, partim captivos abduxerunt. Nostri
itaq; sic undiq; circumventi, cum nec pulverem
tormentarium (nam is incuria militum incen-
sus jam antea perierat) nec aliud quicquam ha-
berent, quo se defenderent: aut promiscua cade su-
orum maiorem quàm hostium stragem ederent:

in pedes ita effuse se coniecerunt, ut præcipiti fuga
aliis super alios ruentibus & pondere equorum
protritis & elisis, miseranda strages facta sit. Cu-
mulus enim conculcatorum & collisorum, non ali-
ter atq; manipulus & fascies spicarum in area a-
cervatim collectos videre licebat. Adversarii
quoq; qui insatiabili Christiani sanguinis siti tene-
bantur, cum plumbearum pilarum ictus ingemi-
narent, non paucos ex suis quoq; una ladebant &
fœdè discerpebant. Quod verò ad octo millia ha-
statorum peditū attinet, quos Lusitanus in sua acie
habuit, cum ii nihil aliud egerint, quàm ut toti-
dem hastas barbaro hosti relinquerent, experien-
tia ipsa docuit, quàm parum profuerint in pralio.
Nam cum his pro totidem sclopetariis (quos hosti
obicere debuerat) rex usus sit : ex iisdem ruinam
certissimam sibi machinatus est. Et quanquam res
in summum discrimen adducta erat, Lusitanus
tamen rex hosti incommodare non cessabat : &
modo hac in parte, modò in illa, non pluribus
quàm septem aut octo Tingitanis ambactis comi-
tatus, occurrebat. Lusitani enim nobiles & equites
adeo ignavi & imbelles feruntur fuisse, ut multi
eorum relictis equis in aprica loca & currū um-
bras ad frigus captandum se contulerint, eo ani-
mo ut cum rem omnem perditam cernerent, ipsi
fuga sibi salutem quærerent. Atq; ita cum par-
tim pedibus, partim equis Arzillam versus, unde
venerant, fugere cepissent : tanto impetu Mauri,
ac præsertim equites (qui adhuc integri erant) eos
prosecuti sunt, ut miserandam eorum stragem edi-
derint.

derint. Rex tamen Sebastianus, suos deserere & fuga salutem quarere indecorum ducens, cum suis illis paucis strenuè rem gerebat: tot cædes faciebat, tot orco demittebat, ut multi fulmen illum appellarent, pauci sanè aspicere aut contra tueri audent. Tandem sexaginta circiter milites Abdelmeleci, ex regis cæde gloriam quasituri, globo facto eum circumdederunt. Is ergo cum nullam sibi ad effugiendum viam superesse videret, uni ex suis ambactis mandavit, ut candidam fasciam hastæ appensam in signum deditiois erigeret. At illi, qui eum incluserant (Alarbes scilicet, genus omnium maximè barbarum & crudele) hoc signo in auxilium Lusitanos vocari existimantes: ex omni parte impetu facto, regem multis locis convulnerunt, tandemq; ceperunt: & laqueolo galea inciso, duas plagas capiti totidemq; faciei inflixerunt, ut ita de equo precipitatus expirarit. Christianos fugientes Mauri in multam noctem insecuti sunt. Itaq; omnibus victis, dissipatisq; aut in miseram captivitatem redactis: Muleius Hametus receptui cani iussit, & in castra cum cadavere fratris Abdelmeleci rediit: ad quæ pervenientem nox deprahendit, statimq; & regis Abdelmeleci mors publicata, & eadem opera Muleius Hametus pro rege agnitus & receptus est: magnaq; tristitia, ex desiderio Abdelmeleci orta, totum exercitum tenuit.

CAP. XIII.

DE NOBILIBVS ET MILITIBVS, QUI E PRÆLIO TINGIM ET Arzillam confugerunt: deq; numero caesorum & captivorum, & de successore novo in regno Mauritania.

ET si autem hac clades divinitus haud dubie propter delicta nostra inflata nobis est: ducenti tamen aut paulo minus felici successu ex barbarorum manibus elapsi, superstites & salvi evaserunt: è quibus sexaginta equites, reliqui pedites erant: & ex his Antonius Lusitanus, qui per Maurum quendam ex hostium manibus liberatus & Tingim deductus fuit. Caterum Christianorum hoc praelio occisa sunt plusquam duodecim millia. Totus enim campus corporibus hominum mortuorum: quin & cadaveribus equorum, mulorum, asinorum, bouum & aliorum jumentorum, oppletus erat. Inter nobiliores, qui in hoc praelio ceciderunt, fuerunt præter regem Sebastianum dux de Avero, Episcopi Conimbricensis & Portuensis, Commissarius generalis à Pontifice missus, Marchio Irlandie, Christophorus de Tavora, & plures alii equestres nobilesq; viri, quos brevitatis studio omitto. Die Martis (qui fuit quintus Augusti) tempore matutino rex novus misit cohortem peditem, qui mortuos suos in campo cognoscerent: è quibus mille quingentos agnitos, sepultura eodem in loco mandarunt: inter quos fuere multi strenui & celebres duces, regis Abdelmeicci amici & familia-

familiares. His more suo sepultis, Muleii Mahameti (qui tot malorum & cladum autor extitit) cadaver in litore & arenis fluvii, in quo submersus perit, repertum est. Cadaver regis Lusitani inter Christianorum castrorum cadavera inventum est per duos ipsius servos captivos, quos novus rex ea de causa miserat circa diluculum illud, promissa etiam libertate, si regis cadaver reperissent. Nudum igitur regis cadaver cum invenissent, vestibus suis contextum ad novum regem attulerunt: simulq; Muleii Mahameti corpus allatum est. Hac cadavera trium regum in idem tabernaculum delata triste & horrendum de se spectaculum praeberunt, & spectantibus lacrymas excusserunt. Quid enim tristius, aut visu magis horrendum erat, quam tres potentissimos reges uno praelio defunctos simul jacentes conspicer? quorum unius exercitus ipso vivo victus, eo mortuo aliorum duorum regum exercitum statim superavit: cumq; omnes tres ad Mauritania regnum aspirarent, nullus ex ipsis eam tenuit. Sed hanc rem humanis sensibus occlusam, & divina maiestatis occulto iudicio reservatam, omitto. Cadaver Abdelmeleci Fessam, circiter viginti leucas AlcaZara distantem, lectica est delatum, ut ibi sepultura mandaretur: mortuum comitati sunt omnes equites cum una peditum legione. Cadaver Fessam delatum, magna civium tristitia exceptum, maiorum suorum sepulcro est illatum, eodem prorsus habitu & vestitu, & pretioso gemmarum ornatu, in quo defunctus rex est. Muleii

ex nobilibus captivis, regis Lusitani corpus redimere desiderarunt, & pro lytro decem millia ducatorum Muleio Hameto, ut id Tingim mitteret, obtulerunt. Sed Barbarus respondit non decere, si mortui cadaver vendatur: veruntamen si Tingi aut Arzilla sibi cedere velint, corpus se illis redditurum dixit. Verum cum hac res in ipsorum manu & potestate non esset: ulterius progredi non potuerunt: id tamen à novo rege obtinuerunt, ut regis Lusitani cadaver Alcazaram deferri pateretur: ubi etiam id in Xenodochio (quod est in palatio præfecti illius oppidi) sepultum est, appositis custodibus, ne per Christianos auferretur. Cæterum quod ad cadaver Muleii Mahameti attinet, novus rex, ejus patruus, mortuo (quod istantiarum cladiû autor fuisset) cutem detraxi, eamq, salitam stramentis impleri: ac ad deterrendum alios, ne similia aliquando tentarent, per omnes regni sui provincias circumferri jussit.

C A P. XIII.

DE NUMERO CAPTIVORVM:
DE NOVO REGE, REGNI POSSESSIONEM occupante: deq; Abdelmeleci & Mahameti regum natura & moribus.

Viri, mulieres, pueri, servi, Æthiopes, hoc prælio per Mauros capti, numero fuerunt ultra quatuordecim millia: iiq, postridie inter milites distributi, & per omnes Mauritania provincias deducti. Nam ut Mauri ex omnibus undiq;

diq, locis ad pugnam confluxerunt: ita quilibet
eorum suas manubias secum domum ferebat. Cate-
rum quanquam consiliarii novi regis unum id a-
gebant, ut is vel Tingim vel ArZillam obsidione
cingeret, cum praesertim nemo esset, qui resisteret
aut propugnaret: id tamen facere recusavit: sed
potius ad iter Fessanum se adcinxit, ut eius urbis
possessione capta, omnium regnorum hereditatem
cerneret: ratus non defuturos sibi alioqui amulos,
qui se cessante res novas moliri non vererentur. Et
fuit ille quidem pro rege agnitus, sed invitis omni-
um animis & quodammodo subringentibus: nec
ea sanè alacritate, qua alios reges excipere soliti
erant: idq, idè quia in hoc novo rege Hameto
nihil nervorum viriumq, erat: homo iners, negli-
gens rem militarem, nec eiusmodi qui ad regiam
dignitatem sustinendam aptus esset: sed è contra
effœminatus, mollis, delitiis & voluptatibus dedi-
tus, & domi in palatio delitescens: Annos tum
habuit circiter XXI X. aut XX X: nigri coloris:
non crassus, sed procerus tamen & debilis ac nul-
larum virium: & multo minus peritus rerum &
compos prudentiae eius qua in regno administran-
do requiritur: & ut brevi complectar, planè dissi-
milis fratri Abdelmeleco. Is enim mediocri statu-
ra erat, corporis symmetria eleganti, humeris la-
tis, facie candida, sed colore rubro intermixto, qui
gentis illius egregiè commendabat: barba nigra,
eaq, densa & cirris implexa: oculis magnis &
glancis. Deniq, prorsus elegans, & in omnibus a-
ctionibus gestibusq, venustus: & corporis viribus
E robustus

robustus, quas perpetua exercitatione cum in levi-
bus praliis ciendis tum arcubus tendendis tueba-
tur. Hispanicè optimè loquebatur, & quidem sum-
ma cum gratia & venustate: sed & Hispanicè
scribere norat. Italicam verò linguam supra ali-
as tenebat: sed inprimis delectabatur lingua Tur-
cica, ita ut Arabicam (quæ illi vernacula erat, &
in qua pro excellentissimo suæ ætatis poëta habe-
batur) præ ea negligeret. Ingeniosus, acutus &
summè prudens, cum aliis omnibus in rebus, tum
precipue in regni administratione fuit. Scitè va-
riis instrumentis musicis ludebat: saltare optimè
norat: armis & arte militari supra modum de-
lectabatur, in quibus etiam plurimum se exerce-
bat, adeò ut multa tormenta bellica, quæ adhuc in
Mauritania habentur, suis manibus fabricarit. In
omnibus enim rebus, quascunq, aggrediretur, sin-
gulari & omnibus admirabili ingenio erat. Et
quanquam ipse Mahumetanam religionem cole-
bat, ita tamen Christianos & inter hos Hispanos
amabat, ut amorem ipsius & benevolentiam, quæ
erga captivos plurimos exercuit, verbis exprime-
re non possim. Hos enim sine ullo precio seu lytro di-
missos, in Hispaniam redire permisit: eaq, munifi-
centia & liberalitate intra triennium, quo regna-
vit, plusquam ducentos libertate donavit. Omitto
nunc dicere, qua gratia & comitate captivos tra-
ctarit, ne aut prolixior sim quam par est, aut eius
amore longius provectus videar. Sed ne meo præ-
conio opus sit, res ipsa testimonio est, docetq, id Xe-
nodocheum, pro agrotis Christianis juxta tem-
plum

plum Marocense edificatum & multis redivitibus
donatum. Mortuus est anno atatis XXXV,
cum regnasset non integrum triennium: relicto fi-
lio trium annorum cum semisse, cui nomen Ismaël,
qui adhuc hodie una cum matre regina, uxore
Abdelmeleci, Argelia educatur. Quod verò ad
Mulcium Mahametum, ipsius ex fratre nepotem
attinet, is Abdelmeleco junior fuit, natus circiter
XXIX aut XXX annos: mediocris statura: cor-
pore invalido, colore adeò nigro, ut à plerisq; pro
Mauro habitus sit: precipue tum cum ex cande-
scebat. Ingenio erat perverso: nihil veri loqueba-
tur: omnia subdole & fictè agebat: armis non de-
lectabatur, sed (ut in omnibus praliis ostendit) na-
tura ignavus & effœminatus erat. Christianos ve-
rò tanto odio prosequabatur, ut à se captos famo-
aut nuditate enecaret. Quòd si hoc bello, neces-
sitate coactus, aliquam benevolentia in eos signifi-
cationem dedit: id refragante animo & invi-
to quodammodo fecit, ut hos ad sub-
cunda pro se pericula prom-
ptiores alacrioreiq;
redderet.

*

Τῶ Οὐκ δόξα.

EXPLICATIO QVO-
RVNDAM VOCABVLO-
RVM GEOGRAPHI-
CORVM.

HISPANICA.

Lusitania regio est Hispania, quæ secundum Ptolemaeum habet à septentrione Taraconensem Hispaniam, divisam ab ea flumine Durio: ab occasu Oceanum occidentalem, à meridie Anam fluvium: ab ortu lineam ab Ana ad Durium ductam. Sed Strabo hanc regionem aliquanto maiorem facit: sicut & nostra quoque ætas. Portugallia autem hodie vocatur, quasi portus Gallie. Lusitani enim origine Galli sunt. Eorum solertia factum est, ut ab Hispania in Indiam nostro tempore navigetur.

Ulyssona Lusitania civitas regia est: Ptolemaeo Oliosipon, Plinio Olyssippo lib. 4. cap. 22. quam equarum è Favonio vento conceptu nobilem vocat. Hodie dicitur Lisbona.

Conimbrica item Lusitania oppidum, ut refert Plinius lib. 4. cap. 21.

Andalusia hodie vocatur regio inter Portugalliam & Granatam, quæ olim Turditania, postea à Vandalis Vandalia seu Vandalusia, et tandem Andalusia dicta est.

Gades hodie Calis, in capite Betice insula est, ut Plinius lib. 4. cap. 22. Strabo libro 3. Γάδερα πορθμῶ στενῶ διερχομένη νῆος ἀπὸ τῆ τερροῦς τανίας.

Fretum

Fretum Herculeum, hodie estrecho di Gibraltar: angustia maris inter Hispaniam & Africam. Plinius libro tertio capite 1: Terrarum orbis universus in tres dividitur partes, Europam, Asiam, Africam. Origo ab occasu solis & Gaditano freto, quâ irrumpens Oceanus Atlanticus in maria interiora diffunditur. Hinc intranti dextra Africa est, leva Europa: inter has Asia est. Terminantes, Tanais & Nilus. Quindecim millia passuum in longitudinem fauces Oceani patent, quinq; millia in latitudinem. Tam modico ore, tam immensa aquorum vastitas panditur: qua de causa limen interni maris multi eum locum appellaverunt. Proxima autem claustra montes faucibus utrinq; impositi coercerent, Abila Africa, Europa Calpe, laborum Herculis meta. Quam ob causam indigenae columnas eius Dei vocant, creduntq; perfossas exclusa antea admisisse maria & rerum natura mutasse faciem. Meminit & Strabo lib. 3. qui plura etiam de antiquo more columnas loco limitum ponendi refert. Vide proverb. Ad Herculis columnas.

B A R B A R A.

Mauritania apud Ptolemaum in prima Africa tabula, duplex est, Tingitana & Casariensis. Tingitana ab occasu habet Oceanum occidentalem, ad septentrionem fretum Herculeum & Ibericum, ab ortu Mauritaniâ Casariensem, à meridie Getuliam & Libyam interiorem. In hac Ptolemaeus duos Atlantes constituit, maiorem & minorem.

norem. Est in ea principale oppidum Tingis, (hodie Tanger, Plinio Iulia traducta) & columna Herculis Alyba.

Barbaria hodie complectitur quatuor regna, Marocense, Fessanum, Tremissanum & Tuncetanum.

Arzilla hodie dicitur civitas à Lusitanis capta, qua secundum quosdam Antonio Zilis, Ptolemaeo Zilia, Straboni Zelis est.

Argelia sæpe fit mentio in hac narratione, qua qualis sit urbs, an qua vulgo Algierum dicitur, an alia, nescio. Reliqui nomen, quale in Gallico libro occurrit.

Atlas mons Mauritania, hodie ab incolis Clarinus vocatur: de quo Plinius libro 5. capite 1. ad longum.

Tremissa hodie, olim secundum quosdam Ptolemaeo Prisciana.

Mecha urbs est Arabia felicis, cum Mahumetis fano & sepulchro (quod singulis annis maxima virorum mulierumq; turba superstitionis ergo visitur) tum verò mercatu maximè celebris.

Fortunata insula veteribus dicta hodie Canaria vocantur: qua omnibus navibus in Indiam occidentalem euntibus primam stationem præbent: a vicesimo septimo ad vicesimum nonum gradum ab æquinoctiali versus septentrionem sita. Earum prisca nomina sunt, Pluvialia sive Ombrios, Capraria, Nivaria, Canaria, Iunonia & eodem nomine proxima: sex tantum veteribus cognita:
hodie

*bodie septem numerantur: nimirum Gran-cana-
ria, Teneriffe, Palma, Gomera, Ferrea, Lanza-
rotta & Forteventura. Vide Plinium libro sexto,
capite 32. Pompon. Melam libro tertio, ca-
pite undecimo. Solin. capite vige-
simo, & Benzonem.*

Finis.

**Imprimebatur Noribergæ in Officina
Catharinæ Gerlachin, & Hære-
dum Iohannis Mon-
tani.**



